



通州直隸州志

卷十二

人物志上

十一冊

ル 5
1568
11



1865
1368
11



通州直隸州志

人物志

名臣傳

忠節傳

宦績傳

武功附

孝友傳

義行傳

文苑傳

隱逸傳

僑寓傳

敘曰東南奧壤代產英諧沿及今世後先不絕於簡蓋江帶海繞五山之靈磅礴靡既而我

國家培養之澤漸被者長也其中碩德宏猷殊材異彥以暨一行一言之所表見艱夷互舛隱顯雜出班分部居不敢徇譎濫而沒幽潛每一秉觚倍兢兢焉則所以仰式懿徽深人私淑之思者厥有在矣志人物第十

通志 卷三
法至死及爭不可主者悲曰大事由一檢法耶及曰義
理爲先安有高下卒不謂累遷太常博士仁宗年高無
子內官凡四千餘人至和元年上半年上疏云刑有五宮其一
古人除之重絕人之世今宦官之家競求他子鞠絕人
理希求爵命童幼何罪陷於刀鋸臣愚以爲胎卵傷而
鳳皇不至宦官多而繼嗣不育也帝異其言嘉祐三年
擢右正言條十餘事請汰冗兵省冗官除民疾苦會曰
食疏論孫沔龐籍不職狀歲饑疏禁鄰郡閉糶如違制
律俄坐胡宿等劾與沈起增註班例右鐵冶大姓程叔
良出知廬州徙桂州

張次山字東喬年十六登慶曆六年進士主簿泰興會

開河工力整辦包拯賢之薦爲京西轉運判官清名直
節與程頤邵雍司馬光同好惡由是得罪嘗知秦州有
鶴集戒石前若有所訴偵得攫鷄者榜之鶴颺去令長
清勢者高某不法治配海島死邑人稱快

崔敦詩字大雅紹興三十年進士以秘書正字兼翰林
權直歷侍講疏言國家之事成於和同敗於乖異今屯
戍之地軍凌其民民侵其軍宜令將帥郡守消異致和
以稱朝廷愛養之意又言人君乃公論之主人公道用人
人心趨嚮始定嘗論風俗任將經筵倖進救災五事及
州縣培克之弊皆剴切識大體每直宿進講造膝密陳
家人不得覘其藁尙書韓彥直乞賜父世忠廟器詩奏

宜仿古法賜爵勺各一餘圖式俾自製以竹木呂祖謙編文鑑詩奉詔刪定之夙負文望與兄敦禮著述並富江南北詞家稱二崔焉晚居常熟卒贈中大夫常人祀之言子祠

印應雷字德豫嘉熙二年進士知和州北兵闖廬和間制置邛岳遣其出戍卒保和州温州亂改知温州詔以處發兵從之行雷辭攜一僕往設酒高燕口不言賊得其首斬之餘黨悉散咸淳六年爲兩淮安撫制置使知揚州歷兵部侍郎兵馬都總管靜海縣開國伯卒贈端明殿學士雷聰明英爽每視事目光如炬左右莫敢仰視退則溫然孩稚可親也

明竇承芳字世芬洪武歲貢永樂初辟爲監察御史鯁直敢言忤旨下獄赦出復言事謫龍江典史卽日就列成祖憫之復其官屢挫益奮糾劾不少避擢浙江僉事年七十致仕歸蕭然一橐一蒼頭攜之人謂趙清獻猶有琴鶴之累云

顧雄字時俊成化十七年進士授戶部主事犒遼東大同軍督江西福建逋稅釐剔奸蠹不爲利回遷郎中嘗賞糧長勘合赴南部例徵五七千金供北使筆劄雄革之事竣疾歸應天尹冀綺揚州同知李黻憐其貧且病厚贈弗受梟令權法賂雄言巡按求解雄曰我乃黨汗吏耶卒年四十有九

邵棠字民愛七歲能屬文成化二十三年進士知崇慶州都勻亂督饗有功擢南戶部郎進湖廣參議奸民以拓瑩事譁諫入興邸棠治其獄上下帖服轉陝西參政楚寇劉烈擾鄖陽撫勦旬日始赴陝陝劉瑾故鄉也騷屑太甚又大索官人賄棠曰奈何用百姓脂膏博高列乎移疾歸時稱其儒而不迂吏而不俗

凌相字忠甫宏治十二年進士知沂水平役息訟行取廣西道御史劾不職大臣數十人尙書王瓊亦在論列朝內肅然出爲廣東僉事惠潮劇賊李四子等踞大峰嶂十四巢爲亂相勦平之調遼東清覈隱射歲增收馬萬計督修邊城有山負城爲邊人駐馬所得覘城中虛

實相奪其險包山而城遷四川右布政忒部之役轉饒不竭轉雲南擢副都御史巡撫湖廣以病乞歸

姚繼巖字元肖宏治十八年進士歷工刑二部主事調吏部當遷文選郎以汲人張衍瑞賢而讓焉武宗南狩與瑞倡令省院諸臣連章奏留受杖幾死世宗卽位擢太常少卿力爭大禮排桂萼議未幾創發卒年四十有三巖性孝義遠權勢居銓司十年門無苞苴有冰鑑之日無事輒下鍵讀卒之日貧不能成喪

馬坤字順卿嘉靖二年進士以部主事謫雷波推官移判廣州白水寨蠻亂檄討平之入爲南刑部郎知汀州擢湖廣副使川貴苗平參贊有功累遷河南布政河南

多宗室歲廩不繼輒恣橫坤嚴約束祿以時給宗人說服進南工部尙書倭寇海上倡議守禦上平倭七事改戶部又上五事及五議復改北部世宗召見西苑問久遠策上八事曰疏鹽課舉屯收查稅銀責有司覈修邊節調遣重按伏汰冗食已又上七事曰計邊糧覈費額脩屯政清宮莊補餘鹽省折絹議積逋前後凡上三十二事多施行南京振武兵變殺侍郎黃懋官言者及坤削爲民隆慶四年璽書存問卒贈太子少保

黃河字汝清少有異行爲文能屈其先輩以舉人諭滕縣累擢南貴州道御史巡視京城及鳳陽諸倉庾威稜霜厲百寮震竦多望風解印綬去河套議起河與曾銑

合忤旨廷杖遷雲南僉事有殲寇功所在生祠之河剛直善善惡惡分明不爽慕薛瑄之爲人署其不言而躬行語終身誦之

錢爍字君望嘉靖十一年進士歷撫州永平推官擢浙江道御史從幸承天上五事邊務大飭按廣西靖江邸恃僻自恣人緣爲奸爍悉逮治靖江怒奏御史凌轢宗室世宗知爍無他乃不直靖江知建甯府革庫役浮費屯兵需饟急或議更漕法疏止之轉廣東副使以平黎功擢浙江參政金衢嚴諸郡徭弊蠲集創鼠尾聚編法民稱便以勞致疾歸數月卒其爲御史時通歲調兵百人戍京口更番奔命至游勾不能歸爍力議免之通斥

鹵不宜馬牧永樂時以六安災傷暫令代牧久爲例歲
耗民一萬三千五百餘金民大困牒上疏乞裁飭部臣
張瓚覆議遂罷語在田賦志

丁丑志曰少參爲司理活數萬人命爲御史歸百數人
喪爲太守至三十餘年其部尙移書請祀鄉賢爲臬能
戡亂爲藩多旬宣功居鄉德在桑梓所謂生有益於時
歿而可祀於社者非斯人哉

陳堯字敬甫嘉靖十四年進士授工部主事時議立興
獻廟世世勿遷堯援禮正之廷臣弗能用視工清江鑿
上游以受河利建沙河行宮同監者請征商堯不可營
內殿汰虛直十之三出知台州治狀稱最調南安土產

故守市堯弗取轉運長蘆增課萬餘不以厲商按察貴
州三殿災役民取木爲更番議紓其力詔採丹砂開永
甯銀池皆力持之擢廣西左布政裁省靖邸宗人及諸
降人子虛祿萬計巡撫四川六番楊氏二子爭立移檄
遂定滇蠻鳳繼祖跳之建昌滇撫檄堯禽之堯曰建昌
去滇一水而兵不渡將嫁禍也急之則窮獸且挺緩之
一夫力耳蠻偵無他意束身歸進工部侍郎總河道蠲
淮徐河負高郵湖隄決樹木菱土以代石河徙道百二
十里楚邸歸葬輜重千艘漕艘復入之堯選大校探刀
陽湖得故道自潰口轉達胡陵卒無亾失召爲刑部侍
郎移疾歸堯少孤依母邵遠宦嶺外不可偕留婦朱以

養至是念邵益老徵薦不出性嗜學夙從呂柟游得其傳晚年手一編弗輟治河巡鹽兩使者部通堯門下士也一無關說第言通夫役苦領真州鹽不便皆得罷子大科

王弇州曰嘉靖中政府方急私而司寇不以私請竟能完其用以顯迨其末政府方急才司寇以才進而竟能完其志以歸若司寇者可不謂古之大臣哉第所區展堇堇在西南邊徼而鴻碩之猷無以昭灼當代君子謂其所際非時云

袁隨字民悅嘉靖十五年進士初仕戶部嚴嵩羅致之餌以銓司不應知德安府時景邸王安陸田土湖陂侵

入萬計民力凋敝歲又饑隨不動官帑多方賑卹郡縣獲安提學山西衡文絕倖寶舟行遇盜盜覘知隨名曰清官也遂舍去轉江西參政泰和獄逸設計禽之擢四川左布政當入覲吏以例金進叱弗納道經江陵張居正居憂不往弔銜之中以老歸

甲寅志曰通徭役不均方伯力爭之鄰邑侵州界方伯又身先士民爲之分限則當官廉幹可知其在豫章考最爲天下第一宜已顧崔苻亦知其清而先後當國者乃不肖爲朝廷大用之可勝三太息哉

顧養謙字益卿嘉靖四十四年進士授戶部郎編審京商忤尙書劉體乾出爲福建僉事平邵武黨斗亂遷廣

通志卷之三十一
東參議山寇賴一清等猖獗禽之籍爲兵大計調簡補雲南僉事順甯土官猛寅占據大候州謙檄諭悉泣聽命人謂一檄賢於十萬師遷浙江參議尋備兵霸州浙兵民亂巡撫張佳允奏留謙謙曰誅亂民宜速誅亂兵宜緩密與允計率其魁二人遂安調薊州擢右僉都御史巡撫遼東議增兵餉馬價添設守將邊備聯絡歲大水請開海禁糴粟活飢民七萬餘人時海西構禍數侵內地謙與李成梁同力勦撫梁任勇謙任謀以故大小數十戰所嚮有功進南戶部侍郎母憂去石星封貢議起起謙總督薊遼經畧朝鮮議如星指陳有年等爭言不便適孫鑛求代屢疏引疾歸謙有遠量膽識過人童

時輒喜錄古名將事蹟捕黠鼠數十以兵法部署之鼠不敢逸在邊聞羣雁聲異常曰當有警促兵出敵果薄城下按寨小凌河敵猝至令開堡門張蓋坐爲指揮狀敵疑伏引去左右面無人色謙談笑自若也歸里屏跡山水間絕口不言生平宦業所引拔將吏概謝不見卒贈兵部尙書

陳大科字思進生三歲始語五六歲危坐如成人十歲輒以奇文驚塾師隆慶五年第進士授河南推官父憂起補紹興有神明稱召爲給事中江北巡按攝提學非制科請并隸江南汜光湖溢特疏築隄督工慈甯宮后戚犒工疏參犒之一字無人臣禮中外肅然值大旱條

弭災六事累遷太常卿掌科李獻可等十一人請豫教
元子被譴科上書救之大璫馮保以罪閒住南京乞赦
還鄉科論其懷奸窺探罰充淨軍擢右副都御史巡撫
廣西討平田州土司疏善後七策進兵部侍郎總督兩
廣兼巡撫岑溪五山等山獍嘯聚授計左江諸道尅日
告功安南黎惟潭莫茂洽兵起為請於朝撫之皆納代
身金人謝罪進都御史科推功諸將諸將益懷科游擊
彭信古橐千金為壽科怒劾遣去言者願誣蠹科六疏
乞歸卒贈兵部尚書

國朝孫閱達字天士康熙三年進士知太原仁慈清慎務
以德化民兩造赴庭懇切誨諭多罷訟去每鞠盜不敲
扑輒承至刑猶感頌弗輟歲除空獄釋囚歸期三日來
不失一人民稱孫佛同考山西得魏學誠其父象樞語
人曰吾子叨鄉薦不足喜喜出江左大賢門下耳特疏
與陸隴其並薦於

朝會以病歸士民號送百里外宦橐蕭然書卷絮服而已
達志聖賢之學取程子四箴范氏心箴置座右日所為
夜必檢記時謂其不欺

魏敏果曰縱囚一事昔人嘗行之後人嘗論之而事勢
有極不同者唐太宗君天下能制其死生之命故或來
以冀免先生以一邑行之非誠感其心豈易得此

李玉鋈字貢南康熙四十五年進士由兵部郎知楚雄

通州直隸州志 卷五
府姚州上官高厚德漁奪民田七千餘頃訟久不決鉉
一鞫得情寘之法田歸民擢福建糧驛道遷按察使漳
多盜平和胡村逋逃數也大吏檄勦之鉉屏兵衛入山
剽諭得首惡三人餘悉全活疏請糴米安南弛內地渡
臺禁民漸樂業鮮罹法者歸里日囊無餘財語其子若
孫曰余仕閩泉夜燭治讞牘恆惘然泣下遇得生者以
燭跋記之今以貽女女善視之勿謂非滿籛金也鉉仕
糧道時有公帑千金前官沿取入橐鉉獨置藩庫奏蒙
俞旨至是事覺檄鉉入都勘覆無異諸道皆落職鉉
賜克食貂皮文綺歸

沈岐字鳴周嘉慶十三年進士改庶吉士授編修道光

初畿輔荒旱粵商潘仕成捐貲逾萬

特旨賞給舉人嗣江蘇黃立誠浙江葉元埜相繼援案請給岐
居詞垣無言責屬御史朱嶧建言謂朝廷名器不可不
慎恐生富家徼倖之心而阻寒儒進修之志疏入稱

旨嶧岐分校所得士疏卽岐草也嶧夷初至粵東通市疆吏咸
以撫柔爲辭岐獨封奏言夷情詭詐不可不防其漸通
商之端一開恐有華夷雜處之虞

宣宗命樞臣寄交廣東督撫察看情形岐受

上眷自此始厯吏兵禮部侍郎累遷左都御史釐奸剔弊柴立
不阿親老致仕歸岐廉介在官布衣蔬食不改儒素風
宏獎後進娓娓不倦主講揚州與儀徵阮元侯官梁章

鉅同居南河下人目為南河三老重與鹿鳴筵宴奉

旨加尚書銜

賜賓筵人瑞額卒年八十有九

子諡文清

王廣蔭字愛棠道光三年

賜進士第二人授編修累官工部尚書

文宗登極

詔求賢疏薦林揚祖等四人又請起用林則徐得

旨咸豐元年八月恭送

宣宗聖容供奉

盛京鳳凰樓樓高五十七級怡邸謂蔭年邁毋陟級蔭曰

先皇聖容及今尙可瞻仰何忍遽違且禮當升階敢以老廢禮

耶升樓敬謹成禮途次昌風雪沍寒中體還京疾劇遂

卒

子諡文慎蔭篤孝友父嘉禮客浙幕將歸母馮命至港迎視風

適作遙見一舟危甚亟出金命舟駛救即之乃父舟也

為諸生時授徒有法修脯悉供親妻若子麤糲一盂勿

令親知及貴屢典文柄清苦如故常官總憲或勸乞外

蔭曰我二十年窮翰林不識終南捷徑今轉覩顏為此

耶

徐宗幹字伯楨嘉慶二十五年進士知武城泰安高唐

判決明敏日坐堂皇聽民牒訴退則微服偵訪積弊一

清知濟甯捕緝掖匪黠徒屏息濬彭河下游屯民聚眾械阻幹馳諭解散遣爲首者餘杖釋之或議其縱曰民畏水患非與官敵激則生變胡操切爲遷保甯府轉汀漳龍道濟茂等莊巨盜莫敢誰何幹單舸往諭皆投首自縛漳人語曰徐公明漳化更母憂起補臺灣臺匪陷鳳山攻撲郡城擊退之禽其首要臺地平遷福建按察使奉

命幫辦皖豫軍務駐劉家口毫營藉爲犄角遷浙江布政使被議歸粵氛擾江南幹在里練團甚力旋擢福建巡撫寇逼漳龍簡士籌精六閱月閩境肅清以勞勩卒官

子諡清惠

靜海鄉

明李周 崔桐 錢鐸 李夢周 張鳴鶴
國朝丁履松

明李周字公溥生有異姿長而倜儻正統六年舉鄉試第三教授順天擢山西道御史風紀凜然巡按江西四川抑豪汰墨錄囚雪沈獄政教一新時稱名御史崔桐字來鳳九歲從父游南雍出語驚人祭酒徐瓊稱爲奇童年十五補諸生三十八以歲貢舉鄉試第一明年賜進士第三人授編修武宗南巡偕舒芬連章諫留詔跪闕下受杖奪俸世宗卽位諫議大禮復逮詔獄再予杖以侍讀出爲湖廣參議遷提學副使風采卓卓與張邦奇齊名轉福建參政降浙江副使讞王一貫獄首

相餌以千金弗爲奪備兵辰沅平安化山寇永順保靖間苗蠻爭地悉定之入爲南太僕卿轉太常建議薛瑄從祀

文廟擢國子祭酒詔議太子監國抗疏不報屢以災異自劾不允辭進禮部侍郎推吏部適中蜚語得請歸桐忠介廉靜不苟榮祿在事必盡其誠嘗自序曰奉職太愚自處太高操持太執語言太直人以爲實錄

甲寅志曰宗伯以文章氣節把臂何李當時目爲麟鳳自嚴嵩當國座主門生頗爲引避故晚歲韜藏未顯觀自陳至再三猶不免含沙之射則功名之途所關於遭際之順逆者亦可慨夫

錢鐸字振之正德十六年進士與修武宗實錄館臣器其才嘉靖初授刑部主事諫大禮杖闕下厯員外郎郎中厚卹囚審決皆當罪勲貴坐占役伍卒關說不行尙書胡世甯歎爲眞法司出知肇慶府拯窮汰冗改建學校百務具舉調鄖陽擢廣西副使備兵府江生縛賊首梁明鏡等道不爲梗降荔浦朦朧洞諸蠻功最多以剛直中忌罷官

李夢周字希道嘉靖二年進士知甯都數決疑獄僉稱神明檄捕苗設奇計不旬月平豪戶匿丁稅貧弱任疲不堪力剗宿弊委輸遂均俗好鬼祠五王廟歲市子女代牲乃火其廟併毀諸淫祠撤故材新學宮構書院集

諸生講習其中有勢家子橫里中捕治之遂為所中周
笑曰我本東海布衣得一第為百里宰不得當去耳奈
何與不逞者競納印歸寓居揚州

甲寅志曰大令以奇才早售初入仕途宜慮其有傲物
凌人之跡乃去國如遺履歟穎歛鏘似學道者流若夫
火五王廟一革淫俗有西門豹治鄴風何其勇於義哉
能勇者能退始終一義而已

張鳴鶴字東皋歲貢舉順天鄉試授錢塘教諭力崇風
節義利判然主試廣西稱得人時相夏言其僚壻也或
風以請託當內轉鶴笑而不答改知容城矜枉振滯部
民多圖像祀之楊繼盛劾奸嵩下獄朝臣無敢左右者

鶴餽遺至再盛遺書其略曰某以疏狂自取罪戾貽我
知己憂園土三年仰託雲底每尋患難樂處時若有得
自知已觀之若為困苦自己心言之則殊覺受用夫舉
世為仇猶不即死尙從容殘喘吐氣於桎梏之間較之
前代排忤權奸者受禍之慘此時猶為極清明之世矣
盛遇害即日掛冠歸

國朝丁履松字木公康熙四十二年進士授內閣中書出
知扶風邑新被兵務為休息除苛剔煩與民同疾苦治
聲洋溢為秦中第一疾歸百姓遮留不得行會歲旱顧
謂寮屬曰若得雨吾可謝吾民矣有頃雨滂沱歸居軍
山南嶺江潮夜溢男婦裸體奔投松蔽以衣不給割草

薦半覆其體煑餽粥兩晝夜活饑民八百餘人卒時析
貲贍族黨曰吾不欲以所有累子孫也松至孝善事繼
母生平風概清峙人不敢干以私尤獎勵後進學者稱
左山先生

泰興縣

明朱景 翟善 張羽 何棻 何棠 張聽
國朝李開生 季振宜

明朱景字明通洪武三年以儒士徵授本縣教諭召對
稱旨宴鶴鳴樓遷秦府長史永樂初欲官以中書辭曰
臣事先朝三十年筋力衰憊無所建立願得放歸幸矣
御書資善堂及金綺賜之

翟善字敬夫景弟子也十歲補諸生以歲貢徵授吏部

主事超擢尚書仿唐六典自五府六部都察院以下諸
司設官分職之制編集為書曰諸司職掌時初罷丞相
吏部長百寮首被顧問善明於經術奏對稱旨太祖諭
羣臣曰善雖年少宇量恢廓他人莫及也欲為善治第
力辭而止又欲去其家成籍善曰區宇乍定邊防宜益
豈宜私臣太祖歎其賢後坐法降知宣化以終

張羽字鳳舉宏治九年進士知瀋安擢御史疏劾劉瑾
其略曰陛下初年以勵精為治而瑾道之不常視朝陛
下初年以純孝為心而瑾道之不親享廟陛下初年以
繼承為念而瑾道之不得入後宮大學士劉健謝遷尚
書劉大夏韓文等皆顧命大臣首先去之是使陛下不

通志卷之三十一
得用舊臣也給事中戴銑劉蒞御史薄彥徽蔣欽等忠直敢言悉屏逐之是使陛下不得聞忠諫也入覲官僚一貪其財賄則拘留過時登科進士一私其黨與則恩榮破例將材投之於遠招商係之於獄芻粟之腐壞主守倍數追償官吏之犯法公私一切罰米抄沒之刑概施薄罪枷號之辱濫及大臣沿邊諸軍加以丈量陞科之擾逋逃軍士重以里鄰連坐之法凡此數端率皆大弊不報巡按雲南地震又言天時人事皆反厥常而當路不加憂守臣不見郵方物之求急於民瘼禽鳥之愛恩於夷獠私門之橫歛倍於常賦臣謂道隨行乖氣因事逆災變之興猶將未已也亦不報歷知保定邵武府

累官河南布政忤臺使乞歸弟聽

何棊字輔之宏治十五年進士知浦城擢御史正德中洪鍾彭澤先後征川寇棊監其軍親往賊中諭散二萬餘人廣西水道八百里獠獠伏崖伺劫棊策定之通道如故擢南太僕卿調九江副使致仕歸從弟棠

何棠字愛之正德六年進士授禮部主事歷郎中諫武宗南巡受杖出知廣平府減種馬治土豪民大說服時乘輿數出賦歛浩繁請於當道得減半嘉靖初錄舊諫臣加從三品俸疾歸逾月卒

張聽字鵠舉正德九年進士授禮部主事進戶部郎中武宗南巡上疏曰奸賊江彬等熒惑聖聽倡議親征先

發鈞帖御稱威武大將軍鎮國公朱壽舉朝惶駭將以爲所遣將帥則朝廷原無此官將以爲御駕自稱則至尊豈有名號況逆濠就縛師出何名左右欲冒首功必且別尋題目變生意外禍釀無窮社稷之憂不在逆濠而在禽濠爲名之師也聞欲取道淮揚西顧金陵東瞻吳會由杭入豫儻說山水則必有以江南花石綱進矣儻說樓臺則必有以江都迷樓圖進矣儻說吳姬則必有以苧蘿西子進矣又況南方下溼風雨易侵陛下旣馳驅於行陣又疲勞於酒色內外兩虛百邪交中陛下縱不自愛如宗廟何如太后何疏入予杖世宗初伏闕爭大禮復杖尋張璉訐陳九川盜貢玉辭連聽下詔獄

謫知海鹽起提學湖廣得士多爲名臣累官河南布政巡撫延綏以戶部侍郎致仕聽行履矚然每聞朝政得失憂喜輒形於色倭奴入犯貽書鄭曉亟築邑城語在建置志

王百穀曰余客泰興咸推張何二氏人言方伯峩峩若千丈松司徒鑿鑿如百鍊鋼觀察秉憲太守持平皆濟代才也二氏子孫並以文章孝友世其家韋相籛金石君謹厚殆兼之哉可以式是國人矣

國朝季開生字天中幼讀書以寸計援筆千言山陰祁彪佳目爲風胡出治年二十二成進士改庶吉士有豔之者毅然曰古有三不朽男兒志不在溫飽豈博一第爲

榮乎授禮科給事中順治十二年以言事謫戍尙陽堡
凡五歲卒於遷所年僅三十有三

世祖追念舊臣

特旨復原官允歸葬廕一子入監開英毅彊敏論古今成敗事

輒髮指繫請室中手周易一卷諷誦自若徙居窮邊每

飯北嚮工詩善書畫筆端具有忠義氣弟振宜

季振宜字詵兮先兄開生二年成進士知蘭溪差役雜

至咄嗟立辦歷刑戶部主事擢御史多建白巡鹽山西

彈章數十上風節凜然康熙九年疏免揚屬科派歲省

本邑河夫銀二萬七千有奇他邑稱是語在田賦志振

有異才於書無所不窺購求善本手自勘定藏書之富

甲天下焉

如皋縣

宋查道 胡瑗 王顛

明馬繼祖

盲鸞

何瑋

孫應鼈

蘇愚

冒起宗

國朝石為崧

姜穎新

胡香山

戴聯奎

宋查道字湛然其先休甯人父卒官泉州奉母家如皋
性至孝方冬母病思鰈羹泣禱於河得鰈愈母端拱初
第進士尉館陶曹彬辟為從事改興元推官寇準薦其
才授著作佐郎通判遂州徙知果州蜀寇何彥忠屯眾
西充不下道單馬往諭率羅拜請罪受代歸疏言轉運
使副兼廉察郡縣所至或不稱職良由未設懲勸之科
致成因循之弊自今使回日令具舉劾實跡議其臧否

以爲賞罰詔從之出知雷州舉賢良方正策入等拜右
正言直史館累官龍圖閣待制刑部郎中使契丹還乞
外知魏州蝗災出廩賑救給麥種四千斛道所至仁恕
嘗按部從者摘路旁棗以獻爲掛錢於樹而去兒時畫
地爲大第曰此當分贍孤遺及貴官舍聚食常數百人
祿賜散施略盡

胡瑗字翼之父訥海雷推官多著書瑗有氣節專經術
教授吳中年四十餘未嘗求仕景祐二年詔定雅樂范
仲淹薦瑗白衣對崇政殿與推官阮逸同較鍾律授秘
書郎淹帥陝西辟丹州推官建議備邊咸施行移密州
遭父憂舉其族九喪歸葬服闋補保雷改湖州教授是

時尚文辭遺經業瑗倡明體達用之學條約經義治事
一齋以身先之雖盛夏必公服坐堂上嚴師弟子禮學
徒千數爲文章皆傳經義必以理勝信其師說敦尚行
實衣服容止往往相類途遇之不問知爲瑗弟子也故
天下謂湖學多秀彥慶厯四年建太學下州取其法著
爲令召教授諸王宮病辭免皇祐二年召會秘閣議樂
更造鐘磬上之歲餘授光祿寺丞國子監直講既居太
學其徒益眾庠舍不能容旁拓步軍營廣之禮部所得
士瑗弟子十常居四五擢太子中允天章閣侍講讀乾
元亨利貞不避諱上與左右皆失色瑗徐曰臨文不諱
上意解已而疾不能朝數遣中使存問以太常博士致

仕就其子節度推官志康養卒於杭州年六十有七葬
烏程何山詔賻其家謚文昭後世稱安定先生
王覲字明叟嘉祐四年進士授刪定三司令式官不樂
改潤州推官監司遣吏視浙災不多報覲覆按盡蠲其
賦以薦除司農簿轉承時稱要官覲拜命一日即求外
韓絳高之辟穎昌簽判坐公免起太僕太常二丞哲宗
立擢右正言遷司諫疏言國家安危治亂係於大臣今
執政八人而姦邪居半一二元老何以得行其志因極
論章惇蔡確韓縝張璪又劾呂惠卿前知太原心輕赦
令妄興師徒使朝廷內致疑於兵民外失信於夷狄損
虧國體蠹傷聖政並相繼竄去朝論慮人情不安將下

詔慰釋覲曰舜罪四凶而天下服孔子誅少正卯而魯
國治不聞人情不安出令以說其黨也夏主新立桀驚
覲言小羌窺我厭兵故若是然所當謹者不在邊備而
在廟謨又言鬼章雖禽種落未滅於前未可遽戮賈怨
差法復行覲采數十事可通行者餘乞罷又論刑罰輕
重詔開局與編元祐赦文時議諫省徒之外門名防漏
泄實不欲與給舍通覲爭而止蜀洛黨議起力破其說
帝以爲然進諫議大夫坐論胡宗愈出知潤州徙蘇州
民有吏行冰上人在鏡中之語轉江淮發運使入拜刑
戶二部侍郎疏言臺諫闕員近臣奉詔薦舉並須召對
親閱人才去取悉出聖斷與豐稷同使遼還知成都俗

病火葬索侵耕官地表爲墓田疏治城渠人德之號王公渠坐例貶鼎州團練副使徽宗卽位擢御史中丞會改元建中覲疏以唐德宗爲戒宰相忿其言改翰林學士日食草制語復抵忤以龍圖閣學士知海州罷主管太平觀臨江安置覲清修簡淡喜愠不形持正論始終再罹譴不少變紹興初追復龍圖閣學士

明馬繼祖字崇功宏治三年進士知博興寬仁敏決擢南監察御史臺長吳珉侯珣交惡疏劾去之臺中肅然時同官三馬有德馬駿馬惡馬之謠德馬謂祖也忤劉瑾勒致仕

言鸞字廷和年十六舉於鄉第進士累官兵部郎中淮

揚馬課故折徵時議徵馬爭之得免中璫出使徵役溢故額弗盡予進福建左參議分巡建甯寘債弁聶賢於法降大茂山劇賊母老乞歸鸞澹泊夷雅口無雌黃林居十有三年圖書左右不問戶以外事

何塘字粹夫世爲何家堡人以祖從戎河南籍武陟登進士改庶吉士歷編修修撰劉瑾擅政翰林旅見多屈膝塘止長揖瑾怒遂乞歸瑾誅復官經筵觸忌諱謫開州同知嘉靖初進南太常卿與湛若水等修明古法學者翕然宗之累官南右都御史致仕時王守仁以道學名塘獨默如嘗言陸九淵楊簡之學流入禪宗後學未得游夏十一而議論輒過顏曾此吾道大害也塘究性

命之旨涵養和粹臨事毅然不可奪難進易退有高世之節卒贈禮部尚書謚文定

孫應鼇字山甫世家燕莊以清平衛籍登進士授給事中忤嚴嵩出爲江西僉事遷陝西提學副使講求師說身先爲範進四川參政計禽土酋薛兆乾白蓮賊連陷合州定遠悉勦平擢僉都御史劾巨璫中蜚語歸萬厯初起故官疏請勤學勵政親賢遠奸等六事又疏請復建文位號舉朝目爲昌言累遷禮部侍郎充經筵講官進講無逸篇賜衣二襲尋疾歸卒贈太子太保謚文恭鼇早窺聖域以儒術經世海內羣以名臣大儒推之嘗自號淮海不忘所自也學者亦稱淮海先生

蘇愚字君明嘉靖四十一年進士授南刑部郎中出爲福建僉事備兵興泉倭犯崇武同安航海俘斬無算巨寇曾一本擁眾焚掠追及柘林大敗之擢廣東副使監長樂軍長樂寇二十餘黨嘯聚南嶺藍溪間愚給螺溪賊出降縱爲內應密授計縛賊鄒嘉儒等諸巢悉潰潮寇朱良寶依堡阨險架飛樓壘鹵攻破之轉貴州參政招撫苗寇三千餘塞全黔以安累官廣西左布政致政歸萬厯初興化李春芳以其邑苦潦分賦鄰境愚昌言舉彫劫狀減所分過半皋苦邊衣役愚請如旁縣例歲輸郡庫里人德之

冒起宗字嵩少崇正元年進士授行人嘗奉使還都城

戒嚴宗走烽火中單騎入朝朝內因知外臺事咸敬異
宗遷南吏部郎中出巡究西道流賊薄歸德與劉澤清
拒河賊不敢一騎渡臺省交章推邊才然功卒未敘也
補高肇道渡珠江矢曰吾他日歸而取粵之一物者有
如此江抵任揭發賊私直聲聞天下再調襄陽襄陽新
破危在呼吸宗曰男兒委質事君東西南北惟所使吾
今與此城共存亡耳其子襄陰上書政府得調語在襄
傳坐粵任事鐫級起按察副使督漕儲乞歸

國朝石爲崧字五中康熙二十七年進士知靈邱噶爾丹
犯順崧隨征塞上多中機宜老於行間者歎爲莫及時
父與德從兩長髯策馬遍覽諸亭障指畫形勢每陰相

之調樂平明察如神歲大旱年羹堯嚴檄迫民逋崧適
露香禱雨就焚其檄使者歸訴羹曰若老名士屈居下
僚宜有此態擢戶部主事遷員外郎

姜穎新字文庸雍正元年進士分纂會典授編修補刑
科給事中薦劾稱職分巡天津道調通永扁舟河上人
不知爲憲司也怡邸賢之薦於

朝謂於清慎勤外增一苦字擢直隸按察使讞疑獄數十
用法寬恕無少枉好培獎士類就署建觀善堂多築齋
舍課諸生其中親老乞歸

胡香山字夢白生時父邦棟夢人抱子語曰此白香山
也因名年十一補諸生父病刲股毀瘠甚學使高裔

聞而歎曰髫年純孝世之所難書其廬表之雍正元年
成進士改庶吉士授編修遷河南道御史已復改前官
總理咸安宮官學

世宗諭曰爾人品學問朕亦素知爾往造就人才不惟教讀書
也香更定條規闡明經學得觀保李質穎等二十餘人等以
疾歸嘗充一統志纂修官總裁方苞雅相引重爲之延
譽鄂爾泰張廷玉馳書屢招不出
戴聯奎字紫垣性穎異弱冠走京師乾隆三十九年舉
順天鄉試第一明年成進士改庶吉士授編修累典文
衡歷官戶部尙書以事左遷未一月督學浙江

仁宗召對良久退而歎曰

聖恩如此臣何以堪臣雖衰憊頂踵敢自愛乎道光初復原官

未入

覲以疾卒於任奎淡泊明志私居未嘗服紈綺嘗謂仕宦者或
改操華靡累之也武侯天才猶一生謹慎我輩何人此
心一放無所不至矣以故出入禁闈二十年每承

天語不敢外洩在廷集議惟以理辨無疾言憤色綽有古大臣
風

忠節傳

忠為令德為下當然士不幸際百六之運蹈節輕生冰
顧鼎鑊迺至暄涼祠墓怒憤如生夫豈偶哉語云義夫
豈吝其沒烈士不愛其存眇焉之軀與終古已

通州

明周臣 羅恩子功 曹頂 朱寅 蘇應先 何忠
 顧業經 陳奇等 徐可行 王飛 程履端 殷
 尙聲 保薦
 國朝吳應昌 錢邦彥 陳德奎 嚴高 湯兆欽 錢
 會 錢文偉弟文倬等 孫銘恩僕范源 胡兆慶
 王長春 張雲祥 陳文煥 徐聯陞 胡慶雲

明周臣字元弼其先宜春人隸通州千戶所登進士授
 工部主事改刑部大臣子坐事諸司莫敢決臣正其罪
 左遷薊州同知軍屯田沒豪家者以邊功進順天推官

劉瑾黨羅罪窮治不少貸瑾誣之下獄無所坐以辨章
字畫不謹罰俸而已有匿名書數瑾罪惡瑾矯旨責朝
臣五品以下廷跪時酷暑臣憤憤跪烈日中遂死世宗
卽位詔復其家

羅恩襲百戶嘉靖中利和餘西諸場鎮鹽徒嘯聚爲盜
恩職巡邏率官軍捕之潰獨力奮鬪死其子功見父死
鬪益力亦死

曹頂餘西場亭戶也少從父育於土人曹大賓家賓兒
視之髮際有三頂人呼頂兒及長遂以名焉頂所居產
鹽地受募直爲輸販駕艘船出沒江海嘉靖三十二年
倭寇太倉總督張經徵兵於通頂應募隸千戶姜旦部

下與倭接戰江中先以長矛刺其操舟者墮水躍登其
舟沈其鐵纜焚之倭亂江南兵乘之大敗去明年倭三
千餘人寇通頂率水兵五百壁城外疊出撓倭如是二
十餘日城圍解頂臨戰敢獨居陣前矢石交至不爲動
敵仆其楯衆失色頂徐夾鎗樹楯拾石卵回擊之敵不
敢逼敵至勢如風雨諸軍莫能支頂以閒暇應之勇常
百倍前後陷陣斬倭幾百餘級身被數十創功當錄爲
頭領辭不受三十六年四月與倭戰於城北五十里追
奔至單家店自辰至午酣戰不已天雨泥淖蹶墜中遂
及於難年四十有四頂慷慨慕義時以一死自許卒如
其志每戰論功多讓儕輩無所較所得賞賜輒以奉賓

家囊無餘蓄州人倚頂爲長城聞其死無不痛泣者

馮孝原曰曹將軍所謂能執干戈以衛社稷俎豆百世不亦宜乎將軍與夏孝子同時同里閭忠孝節義豈非篤生有數與嗚呼後之人可以興已

朱寅隨曹頂逐倭力竭死

蘇應先襲百戶勦倭陣亡贈指揮使

何忠應募爲鄉兵手刃數倭倭奔踞一大室迹之入門受刺死臨死呼其後者曰此間賊衆慎毋前

顧業經禦倭受十八創死

陳奇薛大德朱臣馬勝袁佑聞栗顧士元張洪陳業萬厯末從把總焦續後捕鹽盜稱水犀精兵與盜遇於大

洋追撲六七十里盜蜂擁攢稍刺奇奇等身被創益奮攘臂大呼盜披靡一盜從脅間突出斜刺奇奇等創迸裂不能格遂死於陣

徐可行字爾思國子生長興主簿先是嘉興有葉朗生之變其黨吳野樵徐山永等匿長興仍謀不軌天啟四年元旦突入縣堂執知縣石有恆逼獻帑金行聞變亟挺劍出厲聲喝賊賊挺刃交下遂先恆死猶罵不絕口居官僅三月耳事聞贈湖州通判

邵潛夫曰徐簿初卑卑猶人耳論其死難功人傑哉卽袁履謙之咀血噴賊何加焉其明於事食之義者乎宜其廟食世世也士抱奇器無尺寸表見於時愧此多矣

王飛應副總兵蔡恩募擢千戶素驍勇人號飛虎將軍
崇正末土賊作亂由岔河掠馬塘飛率卒勦殺二百餘
級馬陷坑窞遇害

程履端字於始諸生甲申聞國變大慟曰君歿矣吾獨
存乎號泣呼天絕粒數日謂其妻馬曰吾有二子長名
曾次名卜一未婉如生男可名閔以教孝也言訖入

文廟焚巾衫投泮池死

殷尙聲字黃鍾諸生桂陽判官已謝事未去郝永忠者
逆闖舊部郝搖旂也流駐桂陽與桂民閔攻城城破聲
死之男婦從難者六人

國朝賜諡忠愍

保薦字君聘例襲揚州衛指揮同知不得就順治二年
大兵南下或趣之避薦曰吾祖父受國恩嘗感激思報以
不獲馬革裹尸爲恨今得死所矣遂捐軀同族死者萬
安孕元鳳鳴景暉四人

范十山曰崇正末文臣屈抑武途世勲不得遂其志如
國法何功名之士鬱鬱無聊不免感慨發憤以思逞而
顧懷忠嬰難其天性迥出尋常萬萬矣

國朝吳應昌字德符讀書知義舉武鄉試第一登進士授
彭城衛守備進浦口都司順治十六年海寇入犯調防
談家洲數有奇功以陷陣不屈死

錢邦彥崖州參將捕海寇陣亡

陳德奎字傑儒武舉宜昌都司嘉慶元年苗匪蠢動奎偵苗建始苗猝至獨力持戰陣亡

嚴高字鵬程碣石都司嘉慶十三年捕盜香山磨刀洋殲其魁餘盜三百餘艘據上游火高舟舟燬高沈於海湯兆欽狼山千總咸豐三年正月偕守備毛兆樑禦粵賊湖北老鼠峽陣亡兵丁死者陸泰等十有八人

錢會掘港外委敵賊江甯陣亡

錢文偉字景禕家貧性孝晨興執親勞屏當周至始就塾母病日勤侍湯藥因精岐黃家言道光十五年成進士知恩安清廉有聲服闋授兵馬司正指揮出知靈寶歲大饑賑米三千餘石民不知擾流亡戴恩調商邱捻

亂方煽偉至晝夜防剿賊望風遁皆曰錢青天不可犯也咸豐三年檄辦糧臺解縣篆粵逆逼豫或謂偉謝事官可去偉弗應五月歸德知府陳介眉率兵出檄偉守西城越日賊大至官紳奪北門遁賊乘間入城遂陷偉率僕從巷戰大聲呼曰毋害我百姓竟及於難賊魁稔偉名咎其徒黨而羅拜焉相戒勿損其尸賊去三日士民具棺斂時溽暑面如生弟文倬文燕從子正榮戚屬湯鵬程王如金王廷楨凌正鎬李許彭季鵬雲如皋林澳林淇季宗岱歸安王善承家丁李升等三十八人丁役解起鳳等八十五人同遇害

詔贈道銜文倬等並優卹鵬程字圖南諸生有文名正鎬其師

諸生作霖子也

孫銘恩字書常道光十四年與父廷元同舉於鄉明年成進士改庶吉士授編脩主試山西其先閔達遺愛地也過其祠拜焉觀者彙歎擢侍講學士暎夷在閩欲僦神光寺講經士大譁官袒夷恩疏禁之遂安主試廣東遷詹事還經九江見諸隘無可守建議木簾防江條十二事咸豐二年進兵部侍郎督安徽學政皖甫被兵試事不舉使署故駐太平危城濱江賊蹤飄忽可至恩捐貲召募親督防禦川兵晝掠縣治其獄率黨持刃入縣堂因喧至恩署恩諭以義皆懾伏去逾年

上命辦理防勦適元病劇遺書招恩疏請省父行

旨嚴譴允歸方候代賊陷太平恩衣冠南嚮坐左右皆散一僕范源侍賊至厲聲呵斥被執至江卽自沈賊掖起脅赴金陵甘言誘降不屈矢志絕粒奄然一息賊以勺水強灌之稍蘇罵益厲慘辱十八晝夜卒遇害源亦死焉

詔贈內閣學士銜諡文節

胡兆慶武舉京口把總從勦粵賊陣亡

王長春武舉吳淞千總從勦粵賊陣亡

張雲祥字石麟少幕於豫宦滇皖浮湛參佐中幾五十年咸豐四年隨攻粵寇攝知繁昌城故陷率團攻勦一年復之六年攻賊南陵死於陣子長椿長圻丁勇楊安等皆斃

陳文煥狼山外委咸豐十年閏二月敵賊句容陣亡兵
丁死者楊金鼇等十人

徐聯陞儘先都司同治二年敵賊江陰陣亡

胡慶雲狼山外委同治三年敵賊奔牛鎮陣亡

靜海鄉

明李存性
國朝夏鼎臣

明李存性字伯真崇正選貢知通江逆獻寇城性率民
守陴二日城破被執不屈死妻吳子呈璠呈琬璠妻江
并僕從四十九人同日死

國朝夏鼎臣字敬承順治歲貢授豐縣教諭未赴海寇入
呂四場鼎偕場使金饒禦之轉戰日暮饒重傷死鼎亦

遇害

泰興縣

宋孫益顧緒顧絢
明茅誦

宋孫益紹定中李全犯揚州應縣令王煥募率眾守城
賊至勢甚盛益呼曰王令君募我來將以護城邑也我
輩不爲一死何面目見令君乎遂身先赴敵死同時顧
緒顧絢俱戰死贈益保義郎緒絢承節郎各官一子

明茅誦字大方少負奇節洪武中以訓導召對擢秦府
長史制詞以董仲舒爲言誦奮激盡心輔導額其堂曰
希董方孝孺爲記建文初遷副都御史燕師起駙馬都
尉梅殷鎮淮安誦遺詩勸殷忠憤激烈聞者壯之燕王

稱帝逮赴京師不屈死妻及子永順家僮道壽文生俱
論誅二孫死獄中後贈左都御史諡忠愍

如皋縣

明朱顯忠

許孚

許直

許德溥

李之椿

國朝黃兆奎

冒芬

〔明〕朱顯忠洪武初以功授濠梁衛指揮僉事從傅友德
征蜀克文州遂留守夏將丁世貞合番兵數萬來攻力
戰却之益兵復攻城中食盡部眾勸忠姑棄城忠叱曰
城存與存城亡與亡豈有怕死將軍耶詰旦出東門拒
戰被傷裹創力戰死贈鎮國將軍都指揮使

許孚字恆二建文元年舉人出方孝孺門官工部主事
權蕪湖四年聞金川不守孺殉節北嚮再拜痛哭曰吾

師獲死所矣吾敢負所知哉飲酖死

許直字若魯崇〔正〕七年進士知義烏母憂歸寢泣柩旁
三年補惠來以治行第一行取吏部主事進員外郎流
賊薄都城約同官貸金饗士為死守計城陷喧傳帝南
行急易服出見賊眾充斥返曰四面兵戈駕焉往國亂
不匡君危不濟吾惟一死而已俄聞帝崩大慟幾絕客
羊廷賢李翀咸以七十老父為解直曰老父自幼以忠
孝為訓今君死臣生為老父辱子毋復言乃更緋服北
嚮拜君南嚮拜父秉燭作書寄父云國勢至此非生平
所及料先聞聖駕南遷欲圖間道趨從佐中興恢復庶
幾忠孝稍全今勢阻時迫義無復之惟有遵授直聖賢

通志卷三
之書語男忠義之事一以報君恩一以明親訓但父老
在堂母柩未舉忠孝之道兩有遺憾直死有餘辜儻聖
禧彌集國運重新則子弟猛力攻書以補男忠孝之不
逮便用紅帖亦借以瀝男之丹血耳又作絕命詩六章
闔戶自經死越三日殯顏色如生年四十有四初諡忠
節

國朝賜諡忠愍

許德溥字元博少喜讀周鍾文聞鍾從賊卽燬其藁北
京破痛哭數日不食揚州破又痛哭數日不食每食必
以崇正錢置几上祭而食食已復哭會嚴雉髮令溥截
髮如頭陀爲雙句鎮吳生師感岳少保事刺字兩臂曰

生爲明人死爲明鬼又刺其胸曰不愧本朝久之吳生
仇家借以傾吳首於官捕溥驗治袒示之曰吾實不忍
忘先朝反復辨詰自比宋謝疊山謂疊山有老母在不
卽死今日亦爲有老父在也繫獄論死臨刑謂所親曰
被間有銀半錠亟持去給老父遊紅橋勿令見兒齒劍
也坐地歌歌曰念我高帝兮祚啓靈長列宗纘緒兮文
德輝煌國步多艱兮賊寇跳梁龍馭升遐兮使我痛傷
志矢金石兮鏤骨靡忘壯懷未展兮懼此禍殃囹圄空
濶兮枷鎖馨香我節已明兮視死如常含笑九原兮得
見先皇子雖幽暝兮魂魄翱翔歌已遂死妻子罪戾胥
王熊當遣送悲惋終夜素嗜酒爲之罷飲妻詢其故請

代戎熊喜竟以妻往逾歲里人冒襄贖之歸遂爲夫婦如初

李之椿字徂徠天啓二年進士由行人改官吏部佞直忤歸與兄之本隱居霞起園神采奇麗人以李百藥呼之福藩立南京起尙寶卿督糧浙東鼎革棄官歸以藏故明敕印未繳論流順治六年

詔曰勝國初亡人人有故主之思况居官食祿者乎凡順治五年以前犯者勿作叛論既釋擔簦入武夷山復中蜚語被收絕粒十四日死

國朝黃兆奎字星五舉人知咸甯咸豐二年同考湖北甫撤棘調攝宜城未履任粵賊薄武昌大吏檄守城賊陷

至守禦旬日城陷率兵巷戰受傷仆地猶瞋目罵賊而死賊殘其尸事平具衣冠葬洪山麓

詔贈知府銜

冒芬字伯蘭幼讀書不屑章句自塾歸拾遺還其主祖篁喜曰吾有孫矣隨父鉅宦楚謁選知開平地界新會鶴山間爲盜藪芬嚴緝捕得魁張大椿等寘之法嘗謂兩漢之治在循吏循吏之政在不擾民而不擾民當自慎獄始攝潮陽調乳源粵賊犯境募敢死士三百人扼水爲守設伏夾擊之賊大潰餘黨結羅坑山賊圖復逞潛聚曲邑芬往捕與羅坑賊遇力戰創劇遂及於難

孫嘉禮等 馬洪父餘謙 馬遇 劉伊 楊世綸
馬襄祖餘濟 保麟 施廷柱 徐廷階父捷 李寶
曾 孫兆龍 邵鳳依子錫純 孫玉樹 陳士楨
劉邦鼎 王藻 馬映辰兄映奎等 孫超

宋施昌言字正臣第進士累官殿中侍御史遷河北都轉運使有言濱棣等六州河可涉當城如邊以備契丹昌曰六州地千里河又數徙城之難契丹未渝盟先自困非便也或請於麟府立十二砦以拓境昌以為麟府在河外於國家無毫髮入而至今餽守者徒以畏感國之虛名今不當又事無利之砦重困財力就除知慶州歷官龍圖閣學士

舊志無昌言傳豈以治家多遺行而少之耶願其規時建議排眾不阿諛諛之槩猶令逢俗者愧焉

張日用字顯之慶歷二年進士知新昌文彥博宣撫河北勸請便宜行事貝州之捷用有力焉子次山詳名臣中

陳博古字守約家素饒兄弟事生產博獨否政和五年登進士官處州刑曹後為德化尉有捕盜功

印應飛字德遠應雷弟也淳祐元年進士開慶初知鄂州兼湖北轉運使蒙古圍鄂權州事都統張勝拒守不下飛與高達馳援堅持久之累官戶部侍郎淮東總領與兄相次徙常熟卒贈龍圖閣學士

明李敬字言納洪武初以文學徵授刑部尚書守法度脩政事已致仕歸復召為祭酒太祖諭曰士貴知古今

窮義理可令諸生讀經史之暇兼讀律令若說苑一書
善善惡惡昭然簡冊間觀之可以遠刑辟未幾免歸
劉文德字遠度以明經徵任監察御史太祖嘗宣諭羣
臣越日廷問有記朕諭者乎舉朝寂然德朗誦即日擢
廣西僉事後有奏德受人金者收繫詔獄帝見之曰得
非記朕宣諭者耶此人豈貪金者釋之乃歸
王弇州云太祖自胡陳之後羣臣鮮當意者於是不愛
高爵越資以收天下賢俊有朝徒步暮金紫者誠可謂
奇遇矣吾鄉李尚書劉僉事皆以海濱微介驟躋顯要
而卒不竟其用惜哉

邵夏字天民永樂二十二年進士嘗謁孝陵讀碑文一

過成誦同儕異之不知方誦時目他碑又成誦矣授評
事數折大獄諸巨璫貴戚贖賄撓法小不愜則含沙射
之夏曰吾官可舍吾法不可犯坐忤落職

甲寅志曰古稱廷尉爲天下平與天子掌三尺法固不
容少屈評事始冠入仕途輒奏讞不苟蓋其難哉是時
評事同榜若賈恭靖耿清惠鄧襄敏皆以名士致大寮
而獨終其身不復振抑又傷矣有贈以詩云小官難執
法直道不容身蓋實錄也

徐宗字叔本景泰五年進士授行人會邊將失利宗往
覘之宣布威德敵人讐服西南茶禁弗戢甚至殺人宗
按視悉爲釐正奏請歲以憲節臨之茶迄無患有中貴

人不法劾罷之嘗冊秦藩弔楚喪無私受擢南兵部郎
寮長墨宗不相能遂歸

曹靖字公安樸實不妄言笑以舉人判大同邊警轉輸
不絕總制王越嘉其才嘗檄查府庫主者賂以金靖叱
之尋乞養歸子連字廷器好交遊能拯人乏連子博字
守約廩貢丞上虞治無近名監司檄知甯海弗就

胡綱字振紀家貧善養爲文負時譽成化十年魁禮經
判南昌地當衝劇綱簡亢不樂事上官及期請代歸
姚珪字宗章歲貢訓郊城巖申條約時宗伯席書知縣
事多所諮訪轉諭觀城去之日書列其事於學宮以爲
勸珪志復古禮在二城以冠喪禮俾士大夫家倡之子

繼崇字元相歲貢習高堂禮成專家教諭都昌甯海悉
如珪繼巖詳名臣中繼律字元望亦歲貢知德安民素
困拊摩而治之調平鄉邑近居庸有繕城之役親走塞
上冒霜雪督之成

胡宗海字仲深舉人諭淄川訓士如親子弟遷知夏邑
五年卒官海初仕時盡以千金產讓其兄居官廉謹身
後落落至無以爲家孫介字汝方博通諸書爲文工徐
庾精小篆亦舉人卒官祁陽

張勛字宏業保曆字天與吳愚字希顏並宏治歲貢剛
直相等勛授遼東經歷與上官不合月餘告歸曆知曲
江忤中貴謫福甯判官發指揮某賊私武弁斂戢愚授

山東理問鞠獄如神諸城令當按啖以賂怒曰彼以吳理問爲何人耶德州衛官侵漁正供訊之寘諸理後以不能俛仰罷歸

張斌字時中歲貢同知曹州部夫開河盡以官直給之役罷直浮當扣還官斌曰焉有旣與之而復追之者

楊瓘字汝玉舉人知臨淄介直莫干以私有上官挈家過境責其厚餼不爲動歸賓鄉飲者三十餘年

柳聰字天性例貢授漳州府知事嘗攝知浦城按治邑豪洪珍民憚且懷宏治末有賊巢南詔驛劇甚聰率兵八百搗其堅渠首就縛未幾盜起南靖聞聰往捕悉遁去

錢鎬字宗周例貢承襄陽昕夕視事能字民去官民刊其績於碑子峰諸生篤學脩行時名歸之

錢錄字宗政事母孝與兄弟析箸有薛孟嘗風弟早卒撫其子成名承松陽攝縣篆裁抑豪猾縣在括蒼山中故有銀冶盜因剽掠爲患錄曰此禍穴也錮之火其旁廬舍檄捕闖寇歷險道千餘里得其渠餘黨悉平子嶸詳名臣中嶸子兆閩字子藩舉人武定推官平反疑獄歲歉計口而餉民忘大無遷知涿州涿孔道冠蓋相望郵置供張悉如節中璫有挾符傳爲覘者廉得其詐痛繩之清錢穀定徭役治行稱最入爲戶部郎兩月卒同曹郎探其筭僅十金爲具歛涿人奔而哭者繼屬焉兆

通州直隸州志 卷三
賢字子愚諸生誠摯好客以詩鳴

凌楷字端甫少好學與兄相並都文譽正德三年進士
歷南戶部郎中嘗督江西諸郡逋鉤覆無隱歸途遇盜
索舟中無所有盜歎服去性至孝連遭親喪哀瘠而卒
弟棡字敬甫杜門課耕讀簡樸可風
馬節字信卿以毛鄭詩教授里中遊其門者率騰遶去
晚乃膺鄉舉知上杭上杭故多盜節至未踰年盜悉屏
跡先是新設永定縣割上杭數里屬焉邑中豪以田附
新邑遺其稅糧兩邑讐訟數十年不解節爲定界立券
眾始受賦

顧沔字世遠謹厚力學夏邦謨牧通延爲課子師嘉靖

初以貢諭靈寶家宰許進使其子弟學焉遷鄖陽教如
初

顧諤字汝理歲貢授鄖陽簿有惠政收邑賦却例金不
受在官僅二年劾後邑人羅侍御按部至通嘖嘖稱顧
簿治狀式其廬者久之子希顏別有傳

凌昉字升伯中丞相子也侍父宦遊無少離善事後母
友諸昆弟周卹戚族恆逾情里無少長貴賤皆稱凌公
子長者官南北城兵馬指揮法曹疑讞輒屬昉平反提
舉四川稽郡邑鹽課歸之司民竈稱便當事密諭索例
金昉正色曰素守清苦官冒此不肖名以取說上官哉
乃引去弟暉字祥伯摯愛如其兄丞閩縣胥吏皆憚邑

貴人不法無敢捕者假謁執之座上竟抵於法累遷固
原同知所在有清名百姓咸呼凌冰云听子飛閣字尙
卿同知沔陽大府檄取空青白銅再三無所應大理陳
文燭颺之廷進行都司斷事

袁濱字興之蚤慧嘗建策走江寇有司才之舉嘉靖十
九年鄉試知撫甯邑多桀黠少年暴行墟舍悉繩以法
頃邊人斬隘入眾莫知委命濱曰無懼亟登城指畫拒
敵狀比解嚴濱已病矣病五日卒撫甯人泣曰脫不虞
再警安得我袁父坐城拒也

葛山字子靜其先仕石港場副使因占籍爲亭戶世有
隱德山爲人長厚篤倫理以貢知南平壽甯兩縣南平
有五驛豪猾盤踞山爲整治使者過始稱便里甲月費
無苛歛僉稱廉仁山氓負險逃稅治之急輒爲亂山曰
龔少卿不云乎治亂民如理亂絲吾當以德柔之耳於
是民始至縣庭上租稅卒鮮逋者子址字士隆歲貢知
青田增別有傳

邵騰字汝升大參棠子也例貢授大興丞進沁州同知
將權州篆監司檄修邊城騰辭篆赴役曰食祿盡職安
敢辭勞轉晉王府審理改靖江並以廉幹稱
楊乾字子清舉人治經尤善春秋就平原教諭同考順
天稱得人擢知禮縣力屏繁苛與民休息秦中稱良吏
焉

馮鸞字子繼歲貢知鄖西因俗爲治政簡化洽精岐黃
民有病呈請方輒效有神君稱上官及同寮爭厚延之
歸以所得藥金遺子曰此從一部本草中來非官資也
任傑字士興歲貢訓棲霞諭益陽餽遺概弗受諸生貧
者割俸賑之嘗謁縣見庭下纍纍數十人詢爲連博士
賦者慨然曰奈何以我故累貧民耶釋之去傑有至性
居喪骨立與人言祿不逮養輒蘇蘇涕下子曾魯字子
唯歲貢亦篤於孝傑卒官千里奔喪哀感路人晚訓無
錫有貴人子與諸生爲難魯力爭之語侵魯魯恚甚攘
臂怒罵並罵貴人坐是拂衣歸
吳邦奇字汝才家貧膺鄉舉猶傭書自給通判廣州有

大盜伏礦中捕之急盜密獻金銀甲各一直千金奇弗
顧盜知不免遁去

顧奎字文耀嘉靖二十八年進士知襄城澹泊自奉里
甲直日者不入一菜監司行縣廩餼騶從無纖豪擾民
行取戶部郎中出知金華府鑿井開山淫習一革

農部蓋純篤君子也在官無赫赫名而民父母之可謂
賢矣生平嚴潔自守無間苑枯居喪墓處三年尤式澆
薄其物而俎豆也宜哉

保岍字允常詹子也例貢丞遂安礦賊竊發單騎入其
巢諭以大義歸至半途從者驚曰賊雲集矣岍端坐林
中俟之賊果至皆負金帛肩壺漿來酬岍賊遂平

范十山曰吾通以戡亂禦變著績名世者凌中丞之在
楚馬少保之在陪京顧司馬之在杭陳司馬之在粵其
最顯者也公少尹耳處僻瘠之邑昌突賊鋒開誠受撫
視四公爲尤難

陳大壯字思立嘉靖四十一年進士由中書擢刑部郎
持正不苟權奄無私干出知敘州府古犍爲郡也與九
絲蠻接壤蠻阿大阿狗等剽攻六縣慘毒異常壯從兩
臺上疏請剿命曾省吾劉顯郭成勦之而以督饟命壯
積兩山險不能進會九日壯偵知蠻重賽賽必醉乃趣
顯眾乘晦攀絕而入蠻果醉殺蠻無算拓地五百里編
民戶授以荒田使開墾焉捷聞進右參政逾年調山東

乞歸養弟大益字思受知壽光南和以清白稱

李貢字龍潭父華工部郎中貢以諸生入太學授甯海
同知海潮數爲患創築五牐民勒石崑崙山頌之知建
昌府勤幹無廢事暇輒屏騶從放歌山水間元孫玉鉉
詳名臣中

凌東京字伯宸事寡母及兄惟謹尤任俠能緩急人有
無喜爲詩不問生產家故落由例貢判涿州下車散馬
價脩築隄防能聲大起知昭平邑新設獷悍難治京首
令是邑蠻左式化以勞瘁卒官

宋堯化字汝雍歲貢知新昌厭習吏事以子應奎舉於
鄉遂歸奎知東光最得民憂去東光民千餘人詣闕乞

奎再至詔許之後擢紹興同知應壁堯中子知灌陽
袁九皋字君鳴濱弟淮孫也父觀諸生兄九功字君敘
歲貢司教四邑二十年清操如一日後判登州皋以進
士知鉛山鉛人生祀皋行取御史閱山西邊堡軍實虛
昌一清視浙鹺內商行賂乞中積引厲邊商痛懲之儲
餘鹽贖鍰二萬八千餘金會榷浙鹽稅遂以入巡河南
改館陶運道省民金亡計河暴漲民廬漂沒悉爲之所
中官魯坤胡濱等怙寵爲虐逮而寘之理後巡順天中
旨遣榷煤稅二疏力爭乃止擢太僕寺卿左遷陝西副
使

范鳳翼字異羽父應龍知慶雲以慈惠爲邑邑無爭訟

解官時翼亦以吏部郎歸築尊腰館偕隱其中翼少登
進士除戶部主事監南新濟陽二倉清核積米六十萬
改吏部汰墨吏進名臣顧憲成高攀龍等爲時所中遂
謝職起尙寶卿大理丞不就坐東林黨爲民復起原官
徵光祿卿皆不就翼在官未久退王北山山茨社提倡
風雅垂五十年海內士夫多爲之品目晚更禍患卒保
其身郡中諸鉅務恆藉翼一言爲解子國祿別有傳
黃啟明字光甫河弟江孫也未冠補諸生屢試不得遇
一中副車猶未離席帽也年五十以歲貢判紹興操履
不苟如家居時聲聞溢浙中旣歸七踐賓筵
王可進字不盈舉人知長壽獻賊寇蜀中檄捕奸民倡

白蓮教者句連千餘家進錄其首黨召至堂下屠牛啖之釋不問反側始安

張元芳字揚伯萬曆四十四年進士二甲釋褐例得尸曹或爭之芳曰天下何官不可做患不得人耳冢宰奇之久仕留都擢湖廣驛傳道兼提學黃漢武德長永六郡以廉能聞遷廣西副使忤鎮奄歸居鄉能任事嘗言於御史饒京罷馬倉立釋無辜願論者惜其好事鬼神猶染習俗云

顧國寶字元善大司馬養謙孫也謙鍾愛之使嗣刑部郎懋賢爲冢孫例廢不就成天啓二年進士知平湖嘉興以廉聲行取吏科給事中主試浙江稱得士卒於官

通故有徭役疲於供億吏胥因之爲奸寶倡綱差法民困以甦鄉人德之

姜玉菓字荆璆天啓二年進士官戶部忤魏璫出知衢州罷官起知臨江有政譽明季掛冠奉母以終

邵潛夫州乘資紀其扶范僕事謂衢州之量不及璽卿顧詣門謝過猶有廉藺風焉蓋城狐社鼠憑藉寵靈庚午焚掠之禍所由起也豈盡其主之咎哉

保良遇字自明會祖諸生確祖餘姚簿槃父恆並有懿德遇由貢司教當塗遷知松陽簡事息訟民不知有官監司以爲懦使加振厲乃乞休

王倣通字龍門父松齡籍海門事繼母以孝聞官廣西

理問御史呂圖南薦攝象州猺獞帖服通以舉人召對
賜進士授刑部郎中爭成勇之獄忤楊嗣昌致帝怒究
問主使通曰倫常萬古爲重三尺童子皆知何用主使
謫廣西驛丞尋復原官甲申之變棄官卒不出

國朝凌質字君受歲貢性嚴直授徒訓子弟皆有法官廣
德訓導淬厲士習化野而文轉華亭論尋歸以世俗喪
葬禮不古臨終作遺訓十餘條示後人焉

徐起霖字傳巖前明副貢知永安遷延平推官順治初
改知邵陽盜劫某宦捕不獲霖出獄囚擇三人曰得盜
貨汝死縱之去如期而獲遷徽州古河池地也號難治
霖先後請革弊政凡七練饒視昔倍以死爭之亦免擢

知真定府時用兵滇南提督劉兆麟募兵數千尋檄去
兵無著夜諜城中官吏惴惴霖以計分屯薄犒之眾始
散權井陘道移疾歸

程天旋字玉璧順治十二年進士知程鄉地界三省苦
夫徵泣陳上臺役乃省山賊羅娃子猖獗害民計禽之
撫其餘黨權知騰越值吳三桂叛授僞官不屈隱雞足
山七年事平相國宋德宜廉其節題授曲靖同知卒官
王兆陞字仙佩舉人知臺灣明幹有惠政行取渡海颶
風作幾覆舟陞檢在任治績略記朗誦片刻風頓息補
兵部主事病歸

王日講字亮臣諸生援例知溫江時滇黔未平鄰邑令

率乞病去大吏檄攝雙流新津身兼三篆措之裕如
黃之孝字百先爲諸生時頗不理於口及知武安多善
政以卓異同知桂林脩建斗河民賴其利累官霸昌道
被議卒滄州弟之弟字百忍諸生喜習宋五子書攻苦
弗輟

李方膺字虬仲閩臬玉鉉季子也雍正元年以諸生

召對稱

旨遂知樂安邑大水不待上請發倉賑民制府田文鏡壯之調
蘭山力陳開墾之弊有名無實虛報則無糧加派則民
病語激切忤王士俊趣以飲章繫之獄民譁然曰公爲
民故獲罪請環流視獄不得入擔錢負雞黍自牆外投

入瓦溝爲滿後

詔按俊罪乃出膺於獄補合肥權滁州卒劾歸嘗言兩漢吏治
太守成之後世吏治太守壞之兩司廉其成督撫達於
朝足矣安用損朝廷二千石爲膺數被議皆太守督過
之故其言如此性兀傲不屑事上官善畫有奇氣尤長
於梅子霞別有傳

保培基字格菴援例同知嘉興雍正十二年浙塘溢興
建條石六千四百餘丈民廬墓當其衝者基力護工竣
民尸祝焉歸里會水災捐千金賑糶無難色居井谷園
與沈德潛袁枚輩千里酬唱爲詩酒交

馬宏琦字景韓雍正四年以選拔舉京兆明年

通州直隸州志 卷三
賜進士第二人授編脩厯官吏科給事中巡中西南城所至肅
然人語云歸騎田舍牛莫怒京城馬其嚴憚如此巡漕
天津會雨潦汗萊彌望輓粟者苦之請發帑脩道建斗
門水陸無阻監糶蘆溝奏增粟二千石山東運弁與德
州相持稽賑不發馳往斥之悉如令建議開海禁運關
東粟減糶給民分巡濟武兗青諸郡邑暑月行阡陌人
馬病暍得井水飲乃蘇告養歸優游林下三十餘年
王景獻字方毅父巖早世母范教之篤好讀史彙漢唐
以來循吏傳繕輯成帙同知廣信不輕敲扑訟獄一清
同官因公逋累卒慨然助償資其孥歸擢知廣州府能
聲益著南海民祈賽擊銅鼓歌云賢太守明且公人和

年豐乞養歸葺珠媚園奉母其中子率曾率子嘉禮嘉
屏嘉禾勲禮禾名諸生屏字保衡副榜教習景山居京
二十年門弟子多通顯屏卒不遇晚年境益窘胸次磊
落口不言貧禮子廣蔭詳名臣中勲子廣佑字佐清初
以舉人攝訓鎮江暎夷人犯至署索犒金脅以刃不爲
動夷壯之去補全椒培育才彥所就倍他邑咸豐二年
登會試第二授知縣簽發安徽未赴卒蔭子來泰字魁
階官刑部樸訥寡交游邸居如洗人稱清郎
馬洪字禹搗父餘謙潛心舉業冬坐火險上披書苦讀
絮褐焚尺許弗覺也應郡試冠曹未試御史臺而劾洪
甫三齡稍長善讀寡言笑寢食恆在母側乾隆七年成

進士知安南故事令赴省歛民供張洪至除之卒官無嗣里人曹益通走七千里迎其櫬歸

馬遇字漢冲舉人登明通榜知仁化黠吏舞文將治之吏覺以贖充巡道吏得司是邑官書歸而求見遇立予杖白巡道卒斥退邑有鉛礦沙虛薄獲利不如額遇請罷之同知順慶檄督巴蜀粟賑蘇刻期迫涪江道險惡遇抵南部舟無少損後調兗州攝府事奸民王倫據壽張破陽穀突城大守虛晝夜巡徼不懈主繕軍器倉卒立辦子有章別有傳

劉伊字莘儒乾隆十七年進士知松滋鹽梟逮捕三十餘人鞫得渠首餘遣去攝隨州獄有繫盜幾刑矣伊廉其寃緝真盜釋前繫者調黃陂改鶴山歸葺所居日素園工書法性率易里中無愚智咸與游云

楊世綸字尙因舉人登中正榜授中書入直樞廷出同知建甯林逆踞臺從福康安征鹿耳門條平臺十策以功記名御史知廉州府諸生某受族誣枉綸出其罪捕白蓮教有市符治病者誤具狀脫之旋告歸築一壺庵以老子光渙渙子廷撰別有傳

馬襄字蒼書祖餘濟知鄒縣除土稅編廟戶額民免私役後補汜水父沅母鄒年十八而寡襄以汧子嗣也少師從叔洪刻厲爲文都雋譽由廩貢訓金山課士有法大被教事發諸生中以姻故株連甚衆襄計救之有兩

生已被逮力雪其寃得釋其一舉孝廉子芬別有傳芬子映辰

保麟字子良乾隆五十五年進士知鄆陵攝許州值楚中用師兵夫供億不敢告勞入貲爲吏部郎補濟東道嚴緝捕課殿最大府倚如左右手三權按察使疾歸施廷柱字贊清乾隆五十四年魁鄉試訓南匯立書院課程昕夕講肄士風丕振邑旱勘災不實民大譁聚眾乘城幾爲變柱登陴曉諭繼以涕眾感悟乃解

徐廷階字晉堂艾捷廩生少孤力學從海門丁有煜游文行似之階十歲善屬文捷友李觀見而奇之曰此君家騏驥也以鄉魁諭舒城邑躁勁少文階至率恂恂無

違教者遷廣德學正歲歉勸分飢黎賴之五年卒官

李寶曾字光緒玉鉉兄玉鏞曾孫也舉人知高縣斷獄詳慎小眚不卽懲善言勸之率改行知郟水民以鏡一架水一盂贖其行調江津歲祲出倉穀活民未上請論償如額卒無悔擢知蓬州清苦自守禮服外敝衣羸躄而已

孫兆鼇字渭綸鄉賢閔達元孫也嘉慶六年進士擢吏部郎記名御史歷查京通倉厥胥吏懾服同考會試蒐求實學所得皆有用才以失察謫戍宣府長子廷元從焉多方求雪逾年赦歸元子銘恩詳忠節中

邵鳳依字瑞朝嘉慶十三年進士改庶吉士散館授知

縣初任武安民苦河役請罷之服闋補修武遷夏邑作訓俗文十餘條悍習遂革同知黃州地多窩匪微服探其巢執渠魁寘諸法權府事校士與上官不洽乃歸鳳生已孤事節母孝博覽經籍解官後猶寂守一編寒暑罔輟子錫純字介之舉人能世其家學以孝友聞

孫玉樹字茂廷以國子生舉順天鄉試知華陰山民爭水久讎訟至是復構樹廉知蚌肇夾山逋賦鑿石建壩插立碑約請免課著為令訟遂解調三原開棧道行旅便之號孫公路同知佛坪疾歸

陳士楨字仲幹嘉慶十九年進士仕皖六年調甘省歷知碾伯甯夏皋蘭擢蘭州府愛士恤民鞠獄無留牘蘭

有官園地窪下數被水患楨洩其流引以溉田河濱創設官渡置大船五往來稱便號陳公船西甯河淤糶者不通捐俸浚之價頓平僉呼活佛郡有偏災步禱不三日輒應其誠感如此護平慶涇道卒官

劉邦鼎字石臣嘉慶二十二年進士知南陵山水暴發邑東北數百里盡為巨浸鼎日乘舟往來拊循築圩埭百餘所民廬壞者補葺之聽訟平恕拔士多寒畯乞養歸蓄書二萬餘卷手自丹黃多所論著於鄉先輩遺文軼行尤加意焉

王藻字燕鎬父宏士有質行乾隆五十年郡大饑米麥價十倍士出積穀以賤直售之全活數萬人藻少不羈

日在稠人中莫之異也道光二年成進士改庶吉士歷御史嚴持二尺不避嫌怨出知瓊州府累官湖南布政使臨事勇斷官吏憚威乞養歸里中興修賑給諸鉅務倡首籌辦輸者恐後郡長吏虛己以待舉城屬耳目焉粵匪寇江南藻奉

命在籍團練選募壯勇飭港汊居民晝夜巡綽遇偽稱難民敗兵渡江來者悉斬之賊卒未一騎入境藻髯長尺許飲啖過人晚年陶情絲竹賓從雜遝終日無倦容坐事被議遂卒

馬映辰字鍾房兄映奎映壁弟映垣映台映庚映杓映階同懷八人並健於文春秋朋試方駕一時辰籍宛平

登進士知榮縣猥亂捕得百餘人大吏將駢誅辰請釋其脅者同知馬邊用威用愛善得夷情歷知辰州銅仁府歸辰少窘於遇把文謁京師沾其緒餘咸致騰達辰落拓如故也既通籍為守令有聲衰年解官幹於里務築亦陶園徜徉以終奎台庚舉人奎字燦榆教諭英山庚更名毓森字蓮青教授松江皆卒官壁歲貢垣杓諸生階字符六亦籍宛平進士知合浦調順德粵氛熾檄造紅丹礮船城陷從子淑章死焉階請兵攻賊七戰皆捷城遂復以勞卒得

卹如例

孫超字崧甫道光十八年進士知曲周邑有古塚巫者

煽之香烟祈禱相屬也超至立平其兆漳滏合流數侵
溢治隄完整倍於舊調甯河薊州以疾解職超行無崖
岸多辯才喜為今時文主講漁陽談藝家服其敏給

靜海鄉

明崔潤父鑛子崑 許盈 姜輅祖源 盛鼎 成相
江師周 張先登 彭大同 李奇逢 張世維
盛以進 李之達 張伯鯨 朱名世姚茂先崔養浩
成友謙父斐然從父自然 李兆星孫于濤
國朝易象兌 楊天授孫彤 成志子祖廕 李夔茲
李秉忠兄秉仁秉義

明崔潤字澤民天順歲貢父鑛嘗掌鄉稅以金五百付
鎔工工負焉鑛破產償之官未與校揚守王恕歎曰厚
德哉是夫必有後潤奉鑛家法以孝稱成化中授郴州
同知清介勤慎深人民隱對宇下如家人父子告歸鄉

里尊為師範卒年九十有四子崑承天台與其令陳衮
並以清操重浙中崑子桐詳名臣中

許盈歲貢仙居縣丞勤政厚民不營私植俸入悉給貧
族遷知玉山彌月卒

姜輅字一中祖源歲貢磊落有大節輅幼孤好學與崔
桐同師盛儼恆以功業相期待舉宏治十七年鄉試知
郴州進九江同知剗衰甚雪冤抑願性慇遇事輒面赤
辭遽不為酖中飴口態坐是忤歸

盛鼎字東厓年十四補諸生旋食餼七試不偶以貢判
昌平董陵工擢知唐山調始興世稱清介

成相字雙江舉人知連州以文化民遷桂林同知山寇

弄兵宗藩弗靖相益詳慎兩同考廣西春秋程式悉出其手忤當道調魯府長史拂衣歸

江師周字壽字先世籍婺源徙家餘東場捐貲建城便倉以備倭患同知解州司珠鹽兩池賦無侵漁寇內逼設伏平之上官交薦決意引歸子孫蕃衍以敦睦世其家

張先登字濟川歲貢知龍南下車首蘇民困捕岑淵劇賊有功調濮陽有大獄諸司不能決登平反之建河渠官鹽賑濟兌運諸議尤中利病初人南雍從郭子章李廷機焦竑游獨契旨要歸里研精著作問字者滿戶外焉

彭大同字雲會歲貢敘州推官有孝廉殺人臬司推門望罰三百金釋之同日殺一人而費三百金將挾萬金可殺三十人乎竟擬辟楊氏子脩怨仇家乘父老病扶至河壩挑其仇斃之誣者論仇人死同日甘心於仇忍視其父河壩之死誰則挾之坐子如律直指聞之曰推官素精春秋可謂見諸行事矣

李奇逢字汝遇周弟開之裔也生而溫厚恂恂若不勝衣見義勇往無退志以舉人訓常州歷知藁城安陸武陵有清操不營營時譽垂橐而歸益務脩飭無竿牘一至郡邑庭也會孫露枝別有傳露孫彝茲

張世維字四所舉人知羅田擢貴州推官壤僻聲阻民

多罔陷維言於巡按活無辜數百人洞苗反側維檄諭
悉平遷知汝州革除養馬解銀諸害郡長趨汝糧魏奄
義兒也圖獻納維觸其怒遂爲所中崇正初復原官不
起

盛以進字從先舉人訓新鄭同考山西所收皆知名士
遷知甯化臨清同知延安並劇地禮士愛民以材力稱
李之達字玉東甯都令夢周孫也舉人授知縣得巨津
曰萬里布天子德澤使百姓見所未見亦學仕之驗也
抵任興革遞舉上官奇其才令攝五篆演善養蠱蠱出
恆有夜光如流星嬰兒觸之立斃達緝捕寘之法害遂
止福龍鹽井久閉議者欲開煎達曰增一時之課商必

虧額乃寢進興化同知力靖海盜有奸弁利其兄子貴
上官授達旨右弁達弗聽戒家人治裝曰時事如此可
久留哉去官以詩文自給附瑄者囊金請達一言爲重
卒拒之

張伯鯨字繩海籍江都萬曆四十四年進士授戶部主
事督延甯軍儲通商惠工軍民便之擢陝西參政敗套
兵長樂堡歷遷巡撫崇正末以兵部侍郎致仕

朱名世字應生舉人知永康姚茂先字羽文例貢處州
衛經歷攝知聊城松陽遂昌崔養浩字義生歲貢泉州
照磨攝知德化並廉斷明敏推良吏才

成友謙字六吉崇正七年進士父斐然長厚好施承海

鹽政聲籍甚從父自然歲貢有孝行教授順甯士式其
訓謙知閩中值流寇震驚拊循有法擢山西道御史首
疏起廢中外翕然巡鹽河東除積弊時海邑坍沒疏豁
差糧語在田賦志甲申後里居以終

李兆星字左園選貢判温州實心愛民暇卽召諸生講
學士風丕變明季辭官自號東老喜著述尤殫心海邑
文獻孫于濤字霞猗亦歲貢讀書敦品有祖風

國朝易象兌字秋濤父有親孝義重里閭兌成順治九年
進士知崇德石門勤惠得民案無留牘以疾歸

楊天授字西紹選貢知定安脩學宮葺城垣墾荒招流
清慎罔間康熙六年除黎寇王之誅等十八人民賴以

安歸里考訂喪祭諸禮不戾於古孫彤有才略歲歉條
救荒策上知州董權文行之

成志字竟成歲貢諭霍邱擢知淄川惠愛爲東省最權
新城捕蝗積勞卒子祖蔭孝友尙氣節歲祲出粟千斛
賑饑人

李彞茲字夔文父亾十日始生痛父早世母王語及之
淚涔涔下就塾歸必焚香以所業告父靈雍正元年選
拔舉鄉試知慈利導民文教弦歌稱盛有兩生年少才
俊坐事彞爲解兩生貴作張詠治蜀頌以獻瞿然却之
李秉忠字瞻葵例貢知黔西調羅平嘉慶初苗匪入竄
勦撫有功進開化知府遷瓊州護雷瓊道先是兄秉仁

知香山善化秉義知滁州梧州皆以清白聞廉能萃一家焉

泰興縣

宋潘及甫 明李儼 徐宗 張城 徐昂 封源潔 李承式子 植 朱一 馮 于志舒 季寓 庸子舜有 國朝張春枝 朱鴛 鸞弟鸞 王令樹 戴衛 蔣光 祖 季芳馨 張家陔

宋潘及甫字憲臣少師胡瑗瑗妻以女弟慶歷二年與兄希甫同舉進士歷尉懷仁判筠州知分甯霍邱壽春咸有聲遷楚王宮教授嚴律禮法神宗嘉之進屯田員外郎判江州遷朝散郎及厲志文行後學多與之游晚年病目命子弟執筆讀其前傾聽不倦將卒猶卧聽周

書漢史口占詩遺親友

明李儼字民瞻舉元至正四年鄉試充通贊官洪武元年授都督府斷事論輔治三計進刑部侍郎精勤通敏詳於讞獄奉敕宣諭陝西還進本部尚書轉戶部賜一品服金帶令從奉天殿服之以出學士宋濂等送歸第遷陝西行省參知政事其卒也太祖為之輟朝一日徐宗字中立歲貢都督府經歷太祖廉其清苦擢知廣信府興學修文吏治稱最

張城字世連十歲能詩文二十六舉鄉試父忠殉哀毀骨立將葬大雨雪與兄琳號泣顛天天霽葬畢雨雪如初天順中召為中書舍人成化元年偕太僕金湜使朝

鮮賜一品服挾畫工往自燕山至鯨城四千餘里每繪一圖紀之以詩還朝尋卒子髓別有傳

縣志曰求忠臣必於孝子之門使舍人不早死得竟其施其所表見必過人遠甚國寶早摧國香先萎悲夫

徐昂字文學宏治九年進士累官兵科給事中三陳治道兩論邊務皆剴切中時弊正德元年尚書韓文坐劾

逆瑾罷職昂疏言文素端謹國家倚重其言乃忠憤所激不宜罷遣瑾矯旨斥昂為民嘉靖初起廣東參議

封源潔字一清歲貢判許州知滎陽改河陰所至稱廉明鄭州六邑役不均父老詣當事乞潔編審不待報擁其車去編定羣情帖服

李承式字敬甫其先大同人中鹽揚州遂徙秦式成進士

歷官榆林兵備道罷倭犯朝鮮以邊才起用多立功進福建左布政子植字汝培進士授御史劾太監馮保

十二大罪疏入夜半逐保籍其家爭大峪山壽宮被黜起僉都御史巡撫遼東墾田四萬畝歲獲亾計戶部推

其法於九邊卒贈兵部侍郎

朱一馮字非二萬厯二十六年進士知信陽節省浮費雜役不以擾民入為兵部郎歷職方武選刊布規式樞

政一新累官副都御史巡撫福建定福甯汀州諸亂撫輯海島朦腫全閩安堵天啓間立魏瑄生祠者洵洵若

不及馮不為建罷官

通少南秦州志 卷三
于志舒字明純天啓二年進士授戶部主事監倉二年積羨米萬計後司銀庫革陋弊收兌無滯難轉吏部忤瑞歸舒留心理旨亢爽無靡節母年九十孝事弗渝居里尤任卹可風

季寓庸字因是天啓二年進士知餘姚調臨海祥符能勝劇任行取吏部主事吳姓解學龍交稱之歸里侍父三卿垂二十年順治初灘民爲亂庸與知縣陳棐登陴防畫邑卒無恙子開生振宜詳名臣中舜有字天選副貢同知嘉興捕巨盜沈文侯奸藪遂空解官歸爲故令李蜚英償千金逋代貧民納常平穀八百石里多其義

國朝張春枝字元夢選貢知武昌剪除巨憝奸宄盡逸去官送者泣下邑苦充里長倡籲革除并除瓜儀插夫累至今德之

朱鴛鷺字近光康熙九年進士官行人賁

詔廣東戒騷擾却吏餽事竣南旋卒於道弟鸞鷺知鹽山善捕盜同知泗城總督金光祖檄督軍糧進知慶遠府未赴卒

王令樹字桐孫康熙十八年進士知富順行取禮部主事調刑部恪共厥職擢山西道御史監會試破論疏上獲免朝野服其樸誠

戴衛字沁源知河內邑有劇盜號老鴉賊衛勦撫並施盜遂戢權歸德府歸工書出入趙董

蔣光祖字南村選貢知虞城虞自橫河南徙築隄禦防
官民交困光相地勢謂河不北遷患無弭時請開引河
一道河北流虞始安堵虞多廢隄防河者借私毀名誣
良善光言於上官許民領種害遂除擢知鄧州乞養歸
裝蕭索不名一錢

季芳馨字卉浦乾隆元年進士改庶吉士知聞喜邑荒
地三萬五千餘畝當科力請臺司十去八九歲省民數
千緡有富豪殺人挽有力者營救札盈尺意馨寬仁必
脫之馨竟持法不貸調永濟昕夕聽政疾作乃歸
張家炎字師瑞初仕皖歷丞倅合牧有聲擢知潁州府
再補汀州捕贍匪鋤奸雪枉苞苴不行稱海邦廉守

如皋縣

後漢吳呂岱

宋王惟熙 王俊義

明昌檜

李素孫情等

劉鑑殷喙

劉瑗

昌政

冒鵬曾孫

孫愚元孫日乾

丁鵬

宗傳

錢藻祖徹

沈耀

蘇舜民

范桐

郭師古

張勉

學子美中

許汝忠

盧守儉

從弟洛

李上古

林子伯龍

昌夢

國朝

丁其譽

高巖從子清

沙鼎子漢

鄭助兄助

子大德等

張懋昭子學

孫朝縉

顧鎔

從子三餘

三秀

史鳴皋

程化鵬弟化鶚

張瑑

吳簾

後漢吳呂岱字定公為郡縣吏避亂南渡孫權召署錄

事補餘姚長拜昭信中郎將累遷上大將軍前後討平

寇賊功甚多孫亮即位拜大司馬岱清身奉公妻子饑

乏始親近吳郡徐原岱有得失原輒論之原死岱哭之

哀曰德淵不幸岱復於何聞過

宋王惟熙字伯廣景祐元年進士尉鹽城縣濱江熙設輕舸往來詰盜盜皆散楚州有獄羣飲殺人意一人扶之莫能辨以屬熙熙勞以酒食遽呼曰汝手用左而死

者傷右尙何辭囚遂服擢大理詳斷奏案成卿使易之執不從遷審刑詳議泗州船兵盜米當死覆之免五人儂智高反掠嶺南諸州吏棄城者皆坐法熙言嶺南兵與城均無足恃奈何以常法寘之死仁宗亦憫之得免累官司封員外郎子覲詳名臣中覲從子俊義

王俊義字堯明遊學京師或薦之童貫拒不答林靈素講寶籙詔兩學選士問道司成以俊及曹偉應亦辭後由舍選奏名列下徽宗親程其文擢第一蔡京邀一見

左右史可得俊不肯往僅拜國子博士改太學博士鄚王謁先聖議諸生門迎俊謂不可並於人主禮如見宰相足矣乃序立堂下王至猶辭不敢當進吏部員外郎爲王黼所惡以直秘閣知岳州卒俊與李祁友善首建正論於宣和間諸公卿稍知分別邪正兩人力也

明昌檜字友松洪武中以歲貢召對時天下甫定田賦不均檜陳利弊侃侃無忌諱太祖嘉之擢廣西道御史李素字叔文年二十七縣召爲吏不就發憤習舉子業舉永樂三年鄉試教諭麻城訓士寬嚴有則去後常見思孫惜字樂夫歲貢經歷襄陽有幹濟郡縣疑獄輒移情謝之惜從子塚字崇義例貢簿端安武弁占軍屯懷

金夜謁却之盡出所占一軍稱神明潔子鎮鈎鈎子藻
並居官肖祖風

劉鑑字明善永樂四年進士知平谷邑有虎害鑑禱於
神虎徙去嘉靖時殷惇以歲貢爲四川行都司經歷民
患虎教民編竹籬銳其上虎亦不至

劉瑗字敬之歲貢知海豐民積逋被繫瑗悉釋去定賦
期人人磯感竟無逋者善治獄剖決多奇中

昌政字有恆籍秦州成進士累官山東參政弛南旺湖
禁以恤貧民調遼陽擢副都御史巡撫甯夏劉瑾覬賄
不得誣政在遼軍儲溢爛斥爲民瑾誅復官

昌鵬字廷舉歲貢知富陽性伉率一日監司行縣臆舟

城下會大雨淖鵬輿而往監司却立受謁鵬徐命隸舁
門加席而後行謁監司怒鵬曰不爾是以朝衣朝冠坐
於塗炭也拂衣歸曾孫守愚字思顏恩貢知高陽地界
瀛鄭九河之匯苦衝溺愚興卒治隄南抵蠡北達安州
蜿蜒百餘里沿隄樹柳三萬株遂成沃壤愚善摘抉務
解嫉不輕受記對簿者數人而已調安肅安肅道未
嘗飾厨傳媚過客豪貴中璫無得撓愚法由是側目遷
知德慶中以事歸愚子曰乾字孺文舉人知安陸俗悍
民貧寬猛交用以邊才擢永平同知贊畫軍務手司出
納無染指土司兵騎縱繩以法一軍帖然

丁鵬字良舉舉人判兗州河決張秋沙灣又決滎陽壞

通州直隸州志 卷三
田廬百四十里河督盛應期大役丁夫五萬人鵬分標
開鑿殺上下流勢修武城廢隄開滕沛魚臺新河兩河
無崩塞患工畢省金萬計例歸主者鵬儲之公主者銜
之遂乞休

宗傳字習夫家貧嗜學夏夜納足囊中以辟蟲由舉人
知邛州不忍椎剝市上譽坐下考去之日猶出橐裝代
叩民償逋賦脫之桁楊傳嘗客揚州有鬻女者相持夜
哭給金贖焉

錢藻字自文祖徵官武昌丞及謝事篋中惟載數石硯
歸藻第進士歷禮部郎中出知廣信府有汰卒八千肆
剽掠當事議陷以金藻堅壁厲兵扼其塞要卒從間遁
去擢山東副使備兵霸州永清朱家口數堙數潰藻出
舍虔禱夜暴風雨漂一巨艦至橫截其口因艦加堙堰
遂成調密雲修築古北口諸塞遷湖廣左布政請告歸
閱一紀起太僕光祿卿進順天府尹卒官初藻受知張
居正既長楚藩先幾引決正敗游其門者竄徒畧盡藻
獨以功名終人謂藻有卓見云

沈躍判德州盜晝掠捕者縱不獲躍窮治如法一生爲
盜誣引力雪之擢太僕主簿其卿故臬令黎堯勳也以
馬政委躍當得羨千金分銖不私悉簿正上勲歎服
蘇舜民承建德不樂其職曰使榜箠民肌膚而腴其脂
膏以自潤吾不爲也縣下訟牒不時報遣令知其廉靜

不過煩之

范桐字汝材丞招遠謁選京師同邸有貧而死者傾橐資其歸比之官一僮肩竹籠而已地產礦金桐却故例無纖豪入居二年與墨令忤歸

郭師古字時用幼英敏家貧無書從人假讀一日輒不怠通知武事倬幹善馳射倭寇舉爲當事謀畫多奇驗萬曆五年進士由戶部郎知廣州府土酋半天雲之亂躬親行陣俘斬數千人服闋補鞏昌西事方迫條安邊十五策擢陝西副使備兵肅州教練整肅敵由是不敢窺邊進左參政廷臣方主款貢忌之中以他事罷歸張勉學字汝循歲貢知福清長於剔決吏無宿奸南日

山延袤八百里海中沃壤也界興福間民交爭數十年不決山田盡蕪學航海往露處決辰遂理其畝子美中判臨清有清操

許汝忠字敬德父鳳究心理學忠奉其訓不苟言笑溥暑必衣冠萬曆初判隨州攝知孝感有冤獄論抵二十七年未決忠立雪之猾胥培斂十倍賦額忠論戍七人復其舊遷同知忠州土人黃某州世將也殊桀驁見忠憚焉

盧守儉字子常簿浮梁厭薄吏事不三年乞歸浮梁張驥來牧泰州先走一介存儉每行縣必造廬訪焉從弟洛字子書同知濱州以廉恪稱罷官濱人孫溫如貳揚

州敬洛有加禮人兩賢之

李上林字元芳甫十齡能盡識先世所藏書如宿讀然
萬厯中知新泰治平稱最民尸祝之旋謝事歸子伯龍
光祿署丞敦行嗜學至是亦解職歸養龍子之椿詳忠
節中

冒夢齡字汝九歲貢知會昌服闋補鄆都奢寅變起鄆
距重慶不數百里賊旦夕薄城下齡堅守年餘乞師石
砭秦良玉擊退之城卒無恙遷知甯州尋歸嘯詠林下
垂二十年子起宗詳名臣中

國朝丁其譽字蜚公順治十二年進士知石樓樓俗剽怒
喜輕生譽引古義導之知讓民罪當坐橐金夜謁譽曰

素矢清白敢以不義汗耶卒寘於理兼精醫民疾得譽
藥之立愈擢行人乞養歸

高巖字山公康熙初耿逆蠢動以諸生參閩督姚啓聖
幕有功

賜一品服已克永安卽檄權縣事撫輯瘡痍安堵如故補孟津
累遷戶部郎中督理南新昌儲穀活饑民亾算從子清
字漣漪隨征噶爾丹敘功授內黃知縣歲饑遽發倉粟
并貸鄰邑粟哺之黃濱運河苦運弁擾清發其私就鞫
上臺黃民數萬人爲清白寃得直再補衡陽衡亦德之
沙鼎字元調通判建昌民樸事簡時設酒饌致諸生朋
校經義暇輒訪麻源華子岡諸勝癖好點蒼山石比還

輦數十篋從人咸疑之發視皆石也梅庚曰君顛不減米老矣已督漕運往返數萬里以疾卒官子漢鯉義士漢鼇字亦夔訓導徐州遷知仙居調山陰積九十三獄力請得除同知杭州革兌漕陋例擢長蘆運同改知彰德府

鄭勛字黽斯與兄勳並由邑校籍於雍勳字克襄孝義著聞勳字書常知高安被議

特旨起刑部主事訖鞠明允尙侍以下胥賴之勛以光祿署正進大理右丞分勘楚閩楚剽悍閩通海洋犯者率重辟勛所讞多平反遷戶部郎中子大德字衣聞康熙六十年進士知山陰雍正時知縣得奏事德條奏山陰及原

籍如皋賦役弊蒙

俞允將原摺交督臣李衛衛清釐浙賦并檄蘇取皋冊籍由是舉弊悉革語在田賦志調鄞縣疾歸勳子大毅同知濟南疏鑿歷下七十二泉水利以興大綸知隴州濬渠設官渡拯饑戢盜皆有法勳子大任大位並鹽大使稱廉幹任後知西充大敬字畏山讀書具偉識

世宗詔京官各舉才能勳卽以敬薦歷知電白陽江所至稱職人謂勳舉其子不爲私也

張懋昭字自明知永安獠獠雜處撫以信義蠻尚悉平卓異入都旅卒永人聞之巷哭插竹而望祭焉先是城守某弁醉忤昭鎮奪其秩昭曲全之至是踣地哭血出

指爪間子學舉字乾夫舉人知番禺勤敏而有恩累遷福建鹽法道舉子朝縉字毓屏同知廈門識蔡攀龍於尺籍中脫其冤獄後鎮狼山縉累遷甘肅布政使顧鎔字大冶舉人登明通榜知修文劇盜劉滿久毒民涖任旬日卽捕得之僉以爲神弟鋼字南英講學不偶以歲貢終鋼子三餘字綺波選貢端粹肖鋼父子並爲邑經師年六十始判信陽駐平昌與士人釐訂文體陋俗知化素工書縑楮造請多於官牘歷攝羅山上蔡告歸未至而卒三秀鋼中子字芝田副榜通判天津亦有治聲

史鳴皋字荀鶴幼聰慧讀書目數行下爲文豪宕有奇

氣以選拔舉鄉試成進士改庶吉士散館授昌化知縣饑民索哺聚擾前令以盜論擬辟皋原之調象山宣蓄水勢修復高平賢昌兩硯同知梧州權柳州檄司軍精幹練敏捷乞養歸主講里中生徒折聖座無虛席程化鵬字馭青父國寶喜錄儒先格言鵬幼沈毅言行一稟於法乾隆十六年進士累官饒州同知撫民以慈折獄尤敏決歸里座隅書飾外不失於人易反已無疚於心難語自勛弟化鶚亦志心性之學學者稱東皋二程

張瑤字崑浦祖志芳從祖志爵並著義問父抒名諸生瑤同知施南兼攝南漳襄陽二縣嘉慶初枝宜逆民騷

動團勇出禦五戰皆捷已賊薄襄城檄塔守長門登陴力堵無恙事平即擢知府事累遷吉南贛甯道

吳簾字簡庵善岐黃術游京師延譽徧公卿間知太和黃水驟溢漂沒六十一堡簾募舸艦備糗餌紮筏濟渡編茅爲屋災黎德之擢鳳陽同知攝六安五閱月清積案數百累遷山東鹽運使

附武功

通州

明江恩 王舜臣 保世甯子王福 國朝馮用 李相 劉士宏 李景曾

明江恩字世祿其先彭澤人高大父溥始隸通州守禦所授千戶世有茂德恩故諸生襲父職上官徵羨丁錢

病貧卒恩請除書十五上乃允嘗調防疏十事其濬西亭石港金沙河尤便民有跋扈卒陵其指揮縛而戮之一軍稱快海寇奪商船浮江泊狼山恩獲其二中有茶商負重費他弁利其有謀殺商冒功強恩恩不可商獲免督運至京會鄉人周臣死逆瑾手骸暴露不敢收恩函其骨歸姚繼巖督鈔工部瑾伺之迫恩解所乘馬速巖歸遂免禍北還舟次遇閩人貧不能歸傾橐以贖邸婦夜奔叱去之恩少師顧雄學詩張宏傑能領其指授平居日臨二王帖見奇書輒手錄諷誦不輟子一山別有傳

王舜臣字宗元襲千戶以詩見知齏使召問軍政甚辦

檄覈鹽課廉溢額狀餌以金不受竟白其事舜事繼母每食必率妻子卷韝上食遇異母弟七人皆有恩

保世甯字玉山萬厯中顧養謙薦其才助援朝鮮斬倭將授百戶調廣西勇刈苗寇進昭毅將軍山海關指揮使子王福字楚揚隨父征亦數有功世襲揚州衛指揮同知天啓三年復以功封定遠將軍福子薦詳忠節中國朝馮用字春華性機敏有膂力崇正時積功至總兵官順治二年

大兵南下豫邸題鎮句容禽茅浮二山賊旋隨貝勒東征駐衢州獲張鵬翼毛邦貴等勦撲姚志卓顧應勳諸營改鎮台州台民亂單騎入營收其首惡東甌紹興金華

諸山寇次第削平

李相字世臣以平耿逆功授狼山千總擢松山守備稱勇幹性尤孝友能贍族三子俱以武畧顯

劉士宏字輿樞雍正八年武進士歷授寶慶副將苗民弗靖率卒三百禦之所向披靡事平有自苗中來者言宏摧陣時單戈一呼若萬餘騎躡其後其驚怖如此

李景曾字效元武舉人任溫州參將嘉慶八年閩賊蔡牽勢張甚浙撫阮元造霆船成景與總兵胡振聲等掩擊獲九十六人礮械數百逾年進總兵賊復寇浙總統李長庚率景及諸鎮擊賊定海大破之未幾病歸道光十一年重與鷹揚筵宴奉

通州直隸州志 卷三十一 列傳 十一
旨賜頭品頂戴

靜海鄉

明吳兆唐
國朝郁之茗

明吳兆唐字省南籍武庠以海防應募副使熊尙文命督戰艦北往隸賀世賢麾下屢有戰功天啓二年歿於軍贈游擊

國朝郁之茗順治三年

王師征廣隸前部屢立大功授游擊

秦輿縣

國朝焦瑞芝 徐左柱 張兆璠

國朝焦瑞芝順治十五年武進士守備政和總督范承謨

王器其才傲攝松溪游擊耿逆之變堅拒偽劄繫獄中三年窘辱百端屹不爲動事定帥府上其狀卽擢前官
徐左柱字清植康熙四十二年武進士由侍衛累擢福州副將調隸督標臺灣朱一貴等倡亂總督滿保駐廈門柱往來征調軍儲悉辦古田山賊藍定等乘釁竊發一日夜馳赴其巢斬魁十餘人餘釋不誅貴等就禽獻俘

闕下

聖祖召問平臺情形

賞賜優渥調臺灣雍正元年捕臺匪黃殿等擢漳州總兵

張兆璠字奐與乾隆十二年登武進士第一累官南昌

總兵樂安饑貧民赴縣索賑令以亂聞撫軍檄璠率兵平變璠廉知其情駐兵城外單騎往撫民安堵

如皋縣

明婁可教

昌渾

昌重光

明婁可教字岐山萬麻中從總兵王鳴鶴援朝鮮屢樹戰績生禽思明賊首鄭可累擢新平副總兵時貢馬價數十倍悉飽邊將教積三千餘金納之公調大同左衛善撫郵軍士思奮進總兵以老歸

國朝曹應鵠字翀霄年十五從戎吳三桂逆命鵠集義旅保惠州

王師入閩擢參將桂憚鵠威名遣道士林日輝懷偽官印

綬說鵠鵠收斬之進勦南甯賊帥吳世琮整軍拒敵鵠設伏山後琮中重傷死遂復南甯師薄雲南賊萬餘人歸順鵠乘高望曰眾整而不亂詐也急陳兵斬其帥胡國柄入白當事請乘夜攻之大將軍賴塔曰賊釜中魚片刻活耳幸為我探碧雞關日未入領騎馳往睥睨寂無人即遣騎歸報曰城可奪也比曉軍不至乃還雲南平擢山東提督

昌渾字樸人副憲起宗曾孫也少兀岸不羣從大司馬金世榮入閩靖海侯施琅征臺檄渾為前鋒親昌矢石先登陷陣遂克澎湖破廈門敘功授建昌游擊烏斯藏苗民陸梁率輕騎走間道設奇破之進成都參將渾在

建時建人不知學捐俸創書院延師教之不數年絃歌四起渾之力也子重光

昌重光字御六少隨父之蜀起身行間奮威將軍岳鍾琪征羅卜藏丹津光間道偵賊西甯歸命爲前鋒光請曰沙漠迷漫非嚮道不能前金川瓦刺熟番可使請往調焉其酋長驕甚日坐礪樓笙歌宴飲光仗劍入曰奉命徵調來幾日矣留不遣何也酋懼伏舉三千以從乃會大軍深入斬其梟阿牙子等丹津遁去數日餘黨悉獲西路平南平營羊崗番猶爲犄角光單騎入塞渠魁就誅南路亦平以功歷授河州副將保安堡土酋王喇夫旦倡諸屯騷擾土門積石間光統兵先攻李計二屯

生禽夫旦餘屯以次納欵旋檄光隨征伊里屯兵巴里坤簡閱訓練時廢眠食軍吏請節勞光曰我從行列超擢至此敢愛身耶未幾疾卒

詔優卹贈總兵



